

# **KONSTITISYON REPUBLIK D AYITI**

*29 mas 1987*

## DEKLARASYON

*Pèp Ayisyen deklare: li dakò ak konstitisyon sa a.*

1.- Konstitisyon sa a la, pou li asire tout dwa Pèp Ayisyen vin genyen depi li endependan, depi an 1804:

*Dwa pou tout Ayisyen jwenn lavi.*

*Dwa pou tout Ayisyen viv lib.*

*Dwa pou tout Ayisyen viv alèz.*

*Dwa sa yo, menm avèk sa Nasyonzini deklare an 1948 sou dwa tout kretyen vivan genyen sou latè beni. Se dwa yo pa janm kapab wete nan men pèp Ayisyen.*

2.- Konstitisyon sa a la, pou peyi d Ayiti kapab mèt tèt li. Pou li kapab mèt richès li. De kwa pou tout Ayisyen egal ego vre, e pou tout Ayisyen rive jwenn jistis tout bon vre.

3. Konstitisyon sa a la, pou peyi d Ayiti kanpe solid, pou li kanpe an fòm, an pamí tout nasyon. Pou li pa restavèk okenn lòt peyi. Pou li kenbe tou sa ki fè Ayisyen, se Ayisyen tout bon, ni nan sa yo mete konfyans yo ladan, ni nan jan yo viv, ni nart fason youn sèvi ak lot.

4.- Konstitisyon sa a la, pou demokrasi pouse bon rasin nan peyi a. Pou tout moun gen dwa suiv lide yo lib. Pou direksyon peyi a pa toujou rete nan men menm moun A menm gwooup moun tout tan. Pou pèsonn moun pa janm ka rive rache dwa pèp Ayisyen nan men I.

5.- Konstitisyon sa a la, pou pèp Ayisyen mache men nan men, nan tèt ansanm, nèt ale, san pa gen okenn chire pit: ni sou afè moun lavil ak moun andeyè, ni sou afè lang, ni sou sa moun kwè ak sou sa moun konnen, piske tout moun nan peyi a, fèt pou yo jwenn bon lekòl pou yo aprann, bon fòmasyon pou yo ogmante konesans yo, bon swen, bon jan travay, bon jan detant, ak bon jan mwayen pou yo refè sante yo.

6.- Konstitisyon sa a la, pou li pèmèt gwooup endependan ki nan sèvis pèp la (\*1), fè travay yo korèk, san youn pa nui lòt.

7.- Konstitisyon sa a la, pou peyi d Ayiti kapab mache selon prensip ki respekte tout dwa tout kretyen vivan genyen: Dwa pou yo viv lib. Dwa pou yo viv alèz. Dwa pou yo toujou kapab di mo pa yo, nan jan peyi a dwe mache. Dwa pou se pa, ni yon ti ponyen moun sèlman, ni moun ki chita yon sèl kote nan peyi a sèlman, ki deside tout bagay, pou tout peyi a.

### Premye Pati Konstitisyon an sou:

#### Republik d Ayiti

#### Drapo, Desen ak Pawòl ki make sou drapo a

### Chapit 1

#### Republik d Ayiti

**Nimewo 1:** Peysi d Ayiti, se yon repiblik. Yo pa kapab separe tè peyi d Ayiti ak okenn lòt peyi. Peysi d Ayiti sèl mèt lakay li. Li endependan. Sitwayen I yo egal ego. Yo fèt pou yo viv lib, nan tèt ansanm, san youn pa kraze lòt, san youn pa fè lòt abi.

**Nimewo 1-1:** Se vil Pòtoprens, ki kapital peyi d Ayiti. Se la, gouvènman peyi a chita. Men, si gen ka sikontans, yo kapab tabli I yon lòt kote.

**Nimewo 2:** Koulè drapo peyi d Ayiti, se ble e wouj

**Nimewo 3:** Men ki jan drapo peyi d Ayiti dwe fèt:

1) Drapo a fèt ak 2 moso twal, menm longè, menm lajè. Moso twal ble a, anwo. Moso twal wouj la, anba. Tou lè 2 moso twal yo, kouche.

2) Nan mitan drapo a, sou yon ti moso twal blan, yon moso twal kare, y a fè, desen yon pye palmis, ak yon bonèt wouj sou tèt pye palmis la.

3) Anba fèy pye palmis la, y a fè desen kèk zam ak kèk enstriman mizik. Men sa y a ekri, anba, sou ti moso twal blan an: MEN ANPIL, CHAY PA LOU.

**Nimewo 4:** Si yo te kapab tanpe yon peyi, men a ki pawòl yo ta dwe tanpe peyi d Ayiti, pou yo rekonèt li tout kote: Tout Ayisyen lib. Tout Ayisyen egal ego. Tout Ayisyen se frè ak sè.

**Nimewo 4-1:** Chante ofisyèl peyi a, im nasyonal li, se Ladesalinyèn.

**Nimewo 5:** Sèl lang ki simante tout Ayisyen ansanm, se lang kreyòl. Kreyòl ak franse, se lang ofisyèl Republik d Ayiti.

**Nimewo 6:** Lajan ki sèvi ann Ayiti, se goud. Goud la divize an santim.

**Nimewo 7:** Okenn chèf, nan peyi a, pa janm gen dwa pran pòz Bondye I, pou yo ajenou devan I. Ni yo pa gen dwa mete non, ou byen potre okenn moun ki vivan toujou, sou okenn lajan, sou okenn temm pou lapòs, sou okenn papye Leta, sou okenn biwo Leta, sou okenn batisman Leta. Ni yo pa gen dwa bay okenn ri pote non moun ki vivan toujou.

**Nimewo 7-1:** Ata pou moun ki mouri, se sèl lachanm ki gen dwa bay pèmisyon sèvi ak pòtre yo.

## Chapit 2 Tè peyi d Ayiti

**Nimewo 8:** Men ki tè ki pou peyi d Ayiti e ki fòme republik d Ayiti:

1) Tout pati il d Ayiti ki a Lwès fwontyè a, ansanm ak tout ti il ak tout zile ki tou pre pati sa a, kidonk: Lagonav, Latòti, Lilavach, Gwo Kayimit, Ti Kayimit, Lanavaz, Gwoskay, ak tout lòt zile, yo jwenn nan lanmè ki pou peyi d Ayiti. Tè peyi d Ayiti fini sou fwontyè, Dominikani, kote solèy leve. Nan Nò, tè peyi d Ayiti rive jis nan Oseyan Atlantik. Nan Sid ak nan Lwès, li rive jis nan lanmè yo rele: lanmè Karayib.

2) Se peyi d Ayiti tou sèl ki gen dwa kontwole tout dlo lanmè ki nan zòn tè ki pou peyi d Ayiti.

3) Se peyi d Ayiti tou sèl ki gen dwa kontwole bout syèl anlè tè k pou li, ak bout syèl anlè lanmè ki pou li.

**Nimewo 8-1:** Okenn lòt peyi pa gen dwa rantre lib, kote ki pou peyi d Ayiti. Yopa gen dwa vann okenn peyi etranje, pa yon ti moso tè peyi d Ayiti. Ni yo pa gen dwa fè, okenn peyi etranje, kado pi pití moso nan tè peyi d Ayiti. Tout papye, tout kontra, tout deklarasyon, tout regleman ki ta fè sa, pa vo anyen.

**Nimewo 9:** Peysi d Ayiti divize an depatman. Depatman divize ann awondisman. Awondisman yo divize an komin. Komin yo divize an katye ak an seksyon kominal.

**Nimewo 9-1:** Se lalwa ki va di konbyen depatman, konbyen awondisman, konbyen komin, konbyen katye ak seksyon kominal, ki va nesesè pou peyi a mache kòrèk.

**Nimewo 10:** Se lalwa ki deside ki sa ki fè, yon moun se Ayisyen.

**Nimewo 11:** Depi papa ou byen manman yon moun, te fèt Ayisyen, moun sa a fèt Ayisyen tou, dèske papa a ak manman an pa te janm mande pou yo pa Ayisyen ankò, lè moun sa a te fèt.

**Nimewo 12:** Yon etranje, kapab vin Ayisyen. Men nan ki kondisyon:

**Nimewo 12-1:** Yon etranje, ki pase senk (5) ane, youn dèyè lòt, nan peyi d Ayiti, kapab vin Ayisyen, selon regleman ak lwa peyi a.

**Nimewo 12-2:** Yon moun ki vin Ayisyen, san li pa te fèt Ayisyen, gen dwa vote. Men, gen kèk plas Leta, konstitisyon an ak lwa peyi a, mete la, pou Ayisyen natif natal sèlman. Pou lòt plas yo, Ayisyen ki pa te fèt Ayisyen, va tann senk (5) ane, apre yo vin Ayisyen, pou yo kapab nonmen yo ladan, ou byen pou yo kapab al nan eleksyon pou sa.

**Nimewo 13:** Yon moun vin pa Ayisyen ankò:

- 1) Lè li vin sitwayen yon lòt peyi, a letranje.
- 2) Lè li nan yon plas ki mande I fè yon travay politik pou yon gouvènman etranje.
- 3) Lè li rete twa (3) ane youn dèyè lòt, a letranje, si li pa te fòt Ayisyen, sòf si li jwenn bon jan pèmisyon pou sa, nan men otorite ki gen dwa bay pèmisyon sa a. Si yon moun ki pa te fèt Ayisyen, vin pa Ayisyen ankò, nan kondisyon sa a, li pap janm ka tounen Ayisyen ankò.

**Nimewo 14:** Yon Ayisyen, ki te vin pa Ayisyen ankò, kapab tounen Ayisyen, depi li fè tou sa lalwa mande yon etranje ki vle vin Ayisyen.

**Nimewo 15:** Yon Ayisyen pa janm kapab vin sitwayen yon lòt peyi epi pou I ta rete sitwayen Ayisyen, an menm tan.

**Twazyèm Pati Konstitisyon an Sou:**  
**Sa yon Sitwayen ye.**  
**Ki dwa li genyen. Ki sa li dwe fè**

**Chapit 1**  
**Ki sa yon sitwayen ye?**

**Nimewo 16:** Yon sitwayen se yon moun ki gen tout dwa sivil li (\*2), ansanm ak tout dwa politik li (\*2).

**Nimewo 16-1:** Se lalwa ki deside, ki lè yon moun kapab sèvi ak dwa sa yo. Ki lè li pa gen dwa sèvi avèk yo, pandan kèk tan. Ki lè li pèdi yo nèt.

**Nimewo 16-2:** Yon moun majè, depi li gen dizuit (18) an.

**Nimewo 17:** Tout Ayisyen, fi kòm gason, moun marye ak moun ki pa marye, kapab sèvi ak dwa sivil yo ou byen dwa politik yo (\*2), depi yo deja gen dizuit (18) an, e depi yo suiv tout kondisyon ki nan konstitisyon an ak nan lwa peyi a, pou sa.

**Nimewo 18:** Tout Ayisyen egal ego devan lalwa, an wetan sèten avantaj, Ayisyen natif natal yo genyen, depi yo pa te janm pa Ayisyen ankò.

**Chapit 2**  
**Prensipal dwa tout moun genyen**

**Paragrap 1**  
**Tout moun gen dwa viv.**  
**Tout moun gen dwa viv an sante.**

**Nimewo 19:** Leta dwe degaje I, tout jan, tout mannyè, pou tout Ayisyen, fi kòm gason, timoun kou granmoun, jwenn lavi, la sante ak respè tout moun gen dwa jwenn, jan sa pale nan Deklarasyon sou dwa tout kretyen vivan.

**Nimewo 20:** Jij pap kondane Pèsonn moun a mò, pou okenn kòz.

**Nimewo 21:** Men ki lè yon Ayisyen fè krim trayi peyi I: 1) Lè li rantre nan lame yon peyi etranje k ap goumen kont Republik d Ayiti.

2) Lè I ap travay pou yon peyi etranje k ap fè lagè ak peyi d Ayiti.

3) Lè li vòlè byen Leta ki sou kont li, etan li nan yon plas Leta.

4) Lè li pa respekte konstitisyon an, etan li anchaje fè respekte konstitisyon an.

**Nimewo 21-1:** Lè yon Ayisyen fè krim trayi peyi li, yo dwe kondane I pou I travay a vi pou Leta, nan travo fòse, san yo pa janm gen dwa fè I gras.

**Nimewo 22:** Men ki dwa Leta rekonèt tout sitwayen Ayisyen genyen toujou: dwa pou yo jwenn bon kay pou yo rete. Dwa pou yo jwenn bon mwayen pou yo fè elevasyon timoun e pou yo ogmante konesans granmoun. Dwa pou yo jwenn dekwa pou yo kab byen manje. Dwa pou moun ki nan bezwen jwenn èd nan men Leta.

**Nimewo 23:** Leta va degaje I tout jan tout mannyè pou tout sitwayen, nan tout zòn peyi a, rive jwenn tou sa ki nesesè, pou yo pa vin malad ak tou sa ki nesesè pou yo refè, si yo vin malad. Se pou sa, Leta dwe mete lopital, sant sante ak dispansè, tout kote, nan peyi a.

## Paragraf 2

### Chak moun gen dwa lib

**Nimewo 24:** Leta anchaje pwoteje libète chak moun.

**Nimewo 24-1:** Yo pa gen dwa ni al dèyè yon moun, ni arete I, ni mete I nan prizon, san se pa pou yon rezon lalwa prevwa, ak jan lalwa di sa dwe fèt.

**Nimewo 24-2:** Yo pa gen dwa arete pèsonn ni yo pa gen dwa fèmen pèsonn moun nan prizon san se pa ak yon manda yon otorite, lalwa bay pouvwa ekri manda sa a, sòf si yo ta bare moun nan, nan men.

**Nimewo 24-3:** Men sa ki nesesè, pou yo gen dwa sèvi ak manda sa a:

1) Rezon ki fè yo arete yon moun, ou byen rezon ki fè yo fèmen yon moun nan prizon, se pou manda a esplike sa klè, ni an kreyòl, ni an franse. Manda a dwe deklare tou, ki sa lalwa di sou jan yo dwe pini zak yo repwoche moun nan.

2) Lemoman yo vin sèvi ak manda a, lalwa mande pou yo avèti moun yo akize a. E, se pou yo kite yon kopi manda a nan men I.

3) Lalwa mande pou yo fè, moun yo akize a, konnen, li gen dwa pran avoka, depi kòz la kòmanse, jistan jijman an fini nèt.

4) An wetan ka yon moun yo bare nan men, yo pa gen dwa arete pèsonn moun, ata ak manda, ant siz è (6è) di swa e siz è (6è) di maten. Ni yo pa gen dwa fouye kay moun, ant siz è (6è) di swa e siz è (6è) di maten.

5) Chak moun reskonsab tèt yo. Yo pa gen dwa arete pèsonn moun nan plas yon lòt moun.

**Nimewo 25:** Yo pa gen dwa fè fòs ak yon moun yo vin pran ou byen yo vle kenbe nan prizon, san pa gen nesesite pou sa. Yo pa gen dwa fè yon moun menas, ni yo pa gen dwa maltrete I, pou fè I pale.

**Nimewo 25-1:** Yo pa gen dwa entewoje okenn moun san se Pa an prezans avoka ou byen an prezans yon temwen moun nan chwazi.

**Nimewo 26:** Lè yo arete yon moun, yo pa gen dwa kenbe I nan prizon plis pase karantuit (48) è d tan depi yo te arete I la, san yo a mennen I devan yon jij. Jij la va deklare

si yo te arete moun nan legal, e li va bay bon rezon ki fe li deside, se pou yo kenbe moun nan.

**Nimewo 26-1:** Si se pou yon kontravansyon, yo va mennen moun yo akize a devan yon jij de pè, ki va fè yon desizyon yo pa ka chanje.

Si se pou yon fèt ou byen yon krim, moun yo akize a pa bezwen okenn pèmisyon, pou li mande jijman, devan dwayen yon tribinal ki la pou sa. Yo rele tribinal sa a: tribinal pou premye jijman. Se dwayen tribinal sa a, ki gen dwa fè yon desizyon espesyal, tou suit, san li pa chita sou okenn lòt kòz. Selon sa komisè gouvènman an va fè dwayen tribinal la konnen, se san dwayen an pa pèdi tan, li va deklare, si daprè lalwa, yo te gen dwa arete moun nan, e si yo gen dwa kenbe I nan prizon.

**Nimewo 26-2:** Si yo twouve, yo pa te arete moun nan legal, jij la dwe pase lòd lage I tou suit. Yo dwe obeyi desizyon jij la san yo pa pèdi tan, menm si yo te mande pou kòz la ale ann apèl, devan tribinal kasasyon, ou byen pou yo pa obeyi jijman an.

**Nimewo 27:** Dezobeyi lwa ki pwoteje libète chak moun, se zak gwo ponyèt. Moun yo fè abi sa yo, gen dwa al nan tribinal ki la pou sa, san yo pa mande okenn pèmisyon. Yo gen dwa mande pinisyon pou tout moun ki fè zak gwo ponyèt sa yo, ansanm ak moun ki te ede yo fè zak sa yo. Yo te mèt sa yo te ye. Yo te mèt nan gwo plas Leta.

**Nimewo 27-1:** Dapre sa ki nan lwa yo rele lwa penal, lwa sivil, lwa administratif, moun ki nan plas Leta ak moun ki anplwaye Leta, gen pwòp reskonsabilite pa yo, lè gen de zak ki fèt kont dwa moun. Nan ka sa yo, Leta gen reskonsabilite pa I tou. Yo rele sa: reskonsabilite sivil.

### **Paragraf 3**

#### **Moun gen dwa pale lib**

#### **Moun gen dwa ekri lib**

**Nimewo 28:** Tout Ayisyen gen dwa di sa yo panse, lib, jan yo pito.

**Nimewo 28-1:** Jounalis fèt pou yo fè travay yo lib, selon lalwa. Nan travay jounalis yo, yo pa gen okenn pèmisyon pou yo mande, ni Leta pa gen dwa kontwole sa y ap di, sòf si lagè deklare, nan peyi a.

**Nimewo 28-2:** Yo pa gen dwa fòse yon jounalis pale ki kote li jwenn enfòmasyon.

Men jounalis la fèt pou li kontwole si enfòmasyon I yo korèk, si se laverite. Li fèt pou I respekte regleman metye jounalis li.

**Nimewo 28-3:** Se kòd penal ki okipe tout fòt ak tout abi ki kab fèt nan afè ekri ou byen pale lib.

**Nimewo 29:** Moun gen dwa fè otorite demann pou kichòy yo panse ki merite fèt. Demann sa yo gen dwa fèt o non yon sitwayen ou byen o non plizyè sitwayen, men yo pa gen dwa fèt o non yon gwoup.

**Nimewo 29-1:** Depi se lachanm yo fè yon demann konsa, se pou yo suiv tout regleman ki va pèmèt lachanm fè yon desizyon sou sa.

### **Paragraf 4**

#### **Moun gen dwa suiv kwayans yo ak reliyon yo, lib**

**Nimewo 30:** Tout reliyon ak tout kwayans lib. Chak moun lib suiv reliyon pa yo, ak kwayans pa yo, depi sa yo fè a, pa kontrarye dwa okenn moun, ni dwa okenn gwoup moun nan peyi a.

**Nimewo 30-1:** Yo pa gen dwa fòse pèsonn moun rantre nan okenn asosiyasyon, ni yo pa gen dwa fòse yon moun etidye kwayans ki pa ale ak kwayans pa li.

**Nimewo 30-2:** Se lalwa ki va di nan ki kondisyon sèvis ak seremoni gen dwa fèt nan peyi a, selon reliyon ak selon kwayans chak moun.

### **Paragrapf 5**

#### **Moun gen dwa reyini lib**

#### **Moun lib fè asosiyasyon yo vle**

**Nimewo 31:** Moun gen dwa reyini lib depi zam pa ladan. Moun lib fè asosiyasyon yo vle, pou tout kòz. Ni pou politik. Ni sou koze lajan. Ni sou lavi peyi a. Ni sou richès ki nan sèvo ak nan lide pèp la. Ni pou tout lòt mouvman ki dèyè lapè.

**Nimewo 31-1:** Pati politik ak gwoup politik kapab pèmèt wè volonte pèp la pi klè. Yo gen dwa fèt, lib. Yo gen dwa travay lib. Yo dwe dakò, ni ak tout prensip demokrasi, ni ak tout prensip ki fè, peyi d Ayiti, se yon peyi ki mèt tèt li se lalwa ki va di, ni nan ki kondisyon pou yon pati ou byen yon gwoup politik fèt e pou li mache, ni ki avantaj li kapab jwenn ak ki avantaj li dwe jwenn nan men Leta.

**Nimewo 31- 2:** Anvan pou yon reyinyon fèt nan lari ou byen nan wout ki sou kont Leta, se pou yo avèti lapolis depi davans.

**Nimewo 31-3:** Yo pa kapab fèse pèsonn moun rantre nan okenn kalite asosiyasyon.

### **Paragrapf 6**

#### **Chak moun gen dwa jwenn bon jan fòmasyon**

#### **ak bon jan konesans**

**Nimewo 32:** Leta dwe degaje I pou tout moun jwenn bon fòmasyon pou fè kontwole, si yo respekte dwa sa a. Se yon dwa tout moun genyen ni pou lespri yo an fòm, ni pou kò yo an fòm. Ni pou yo kapab aprann mache dwat, nan lavi a. Ni pou yo kapab aprann byen viv, youn ak lòt. Ni pou yo kapab aprann travay nan avantaj peyi a. Ni pou yo kapab gen yon bon metye nan men yo.

**Nimewo 32-1:** Bon fòmasyon pou tout sitwayen, sou kont Leta ak moun ki alatèt chak zòn peyi a. Se pou yo rive mete lekòl gratis pou tout moun. Se pou yo kontwole si moun k ap fè lekòl yo, alawotè, ni pou lekòl Leta, ni pou lekòl prive.

**Nimewo 32-2:** Premye travay Leta, ak moun ki alatèt chak zòn peyi a, se fè yon jan pou tout moun rive al lekòl. Se sèl jan yo va kapab mete peyi a sou wout pwogrè vre. Tout moun ki vle bay konkou nan travay sa a, fèt pou yo jwenn ankourajman ak avantaj nan men Leta.

**Nimewo 32-3:** Tout timoun dwe fè klas primè yo. Lalwa va di ki pinisyon yo prevwa lè sa pa fèt. Leta dwe bay elèv lekòl primè tout liv ak tou sa ki nesesè pou yo aprann, gratis.

**Nimewo 32-4:** Moutre moun travay tè, moutre moun metye, moutre moun travay ansanm, ak bon jan teknik, se youn nan gwo wòl Leta ak moun ki alatèt chak komin.

**Nimewo 32-5:** Yo dwe ankouraje moun ki vle bay timoun fòmasyon, anvan y al lekòl. Gen fòmasyon yo kab bay nan lekòl timoun piti, ou byen san se pa nan lekòl.

**Nimewo 32-6:** Tout moun ki gen kapasite pou sa, gen dwa rive fè gwo etid, apre etid segondè, san se pa favè ak moun pa ki fè yo rive jwenn sa.

**Nimewo 32-7:** Se pou Leta kontwole si, nan chak zòn peyi a, si nan chak seksyon kominal, si nan chak komin, si nan chak departman, gen de lekòl ki moutre, sa ki nesesè pou kote sa yo mache nan wout pwogrè tout bon. Men, sa Leta dwe degaje I gaye tout kote nan peyi a, se lekòl ki va: moutre moun travay tè, moutre moun metye, moutre moun travay ansanm, ak bon jan teknik.

**Nimewo 32-8:** Leta dwe fè yon jan pou tout moun ki andikape rive jwenn fòmasyon, pou yo kapab mèt tèt yo, san yo pa sou kont moun. Menm jan tou, pou moun ki fò a lestwòdinè.

**Nimewo 32-9:** Leta ak moun ki alatèt chak zòn peyi a, dwe fè mwayen posib yo, pou tout granmoun nan peyi a, rive konn li fen, e rive konn ekri fen. Yo va ankouraje tout lòt moun ki soti pou yo bay konkou pou sa.

**Nimewo 32-10:** Lajan yon pwofesè dwe touche kòm salè, pou pi piti, dwe sifi pou bezwen l.

**Nimewo 33:** Lekòl pou tout degre konesans, dwe lib. Men, Leta gen pou li kontwole kouman yo sèvi ak dwa sa a.

**Nimewo 34:** Sòf lè yo dèyè yon moun yo bare nan men, yo pa gen dwa rantre pran pèsonn moun anndan okenn lekòl. Okenn lapolis, okenn fòs Leta pa gen dwa rantre anndan yon lekòl, san se pa ak pèmisyón direksyon lekòl la.

**Nimewo 34-1:** Regleman sa a, pa vo, lè se pa pou aktivite lekòl, yo sèvi ak lekòl sa a.

## **Paragrap 7**

### **Nenpòt ki moun gen dwa travay, lib**

**Nimewo 35:** Nenpòt ki moun gen dwa travay lib. Tout sitwayen dwe nan yon travay ki nan gou yo, yon jan pou yo kapab reskonsab ni tèt yo, ni fanmi yo. Yo dwe met men, ansanm ak Leta, pou vin genyen yon sistèm ki va pèmèt moun ki nan bezwen, jwenn èd nan men Leta.

**Nimewo 35-1:** Tout anplwaye, kit se anplwaye Leta, kit se pa anplwaye Leta, fèt pou yo touche yon lajan ki korèk, kòm salè. Yo fèt pou yo gen rekreyasyon nan travay yo. Chak ane, yo fèt pou yo gen vakans peye, ak yon boni, kidonk yon mwa salè an plis.

**Nimewo 35-2:** Leta dwe kontwole si tout travayè travay nan menm bon kondisyon, ni pou pwoteksyon yo, ni pou lajan yo touche kòm salè, kit se fi, kit se gason, kit se moun marye, kit se moun ki pa marye. Kwayans yon moun ak sa li panse, pa gen anyen pou wè ak sa.

**Nimewo 35-3:** Sendika gen dwa fèt lib. Nenpòt ki travayè, kit se nan travay prive, kit se nan travay Leta, gen dwa manm sendika k ap okipe travayè ki nan jan de travay sa a, depi se afè travay l ap okipe.

**Nimewo 35-4:** Sendika pa gen dwa nan politik. Sendika pa la pou fè lajan. Sendika pa la pou afè reliyion. Yo pa kapab fose pèsonn moun rantre nan sendika.

**Nimewo 35-5:** Moun gen dwa fè grèv. Se lalwa ki di nan ki kondisyon.

**Nimewo 35-6:** Lalwa fèt pou di ki laj yon moun dwe genyen pou li kòmanse travay pou lajan. Travay timoun ki minè ak travay moun ki kay moun sou kont de lwa espesyal.

## **Paragrap 8**

### **Moun gen dwa gen pwòp byen pa yo**

**Nimewo 36:** Moun gen dwa gen pwòp byen pa yo. Leta fèt pou li pwoteje dwa sa a. Se lalwa ki deside ni nan ki kondisyon, moun gen dwa rive gen byen ki pou yo, ni nan ki kondisyon ak jis nan ki pwen, yo gen dwa sèvi avèk yo.

**Nimewo 36-1:** Pou yo gen dwa pran pwopriyete yon moun, nan espwopryasyon, fòk se pou yon kòz ki nan enterè pi fò moun nan peyi a. Fòk lajistik gen tan peye moun nan ou byen fòk lajistik gen tan mete yon lajan la, pou moun nan ou byen pou eritye moun nan, apre espesyalis fin fikse ki valè lajan yo fèt pou yo bay, pou pwopriyete Leta bezwen pran an.

Se lemoman yo kòmanse travay ki fè yo te pran pwopriyete yon moun nan espwopriyasyon, espwopriyasyon an kòmanse vle di kichòy.

Si Leta pa kenbe premye lide ki fè, yo te bezwen pran pwopriyete a, demach pou pran pwopriyete a, nan espwopriyasyon pa vo anyen ankò. Ni yo pa gen dwa mete pwopriyete a, a lavant. Se remèt pou yo remèt mèt pwopriyete a, afè l, san li pa gen anyen pou li tounen peye pou sa.

**Nimewo 36-2:** Si se pou yon kòz politik, yo pa gen dwa mete byen, pwopriyete ak kay moun, sou non Leta. Ni yo pa gen dwa wete yo nan men mèt yo.

Anvan pou yo retire byen pa yon moun nan men l, fòk gen yon jijman ki fin fèt nèt, nan yon tribinal yo rele tribinal dwa komén, sòf si gen yon pwogram Leta pou separe tè bay abitan.

**Nimewo 36-3:** Moun gen dwa gen pwòp byen pa yo, se vre. Men, yo fèt pou yo okipe yo. Ni yo pa gen dwa sèvi ak byen sa yo, kont enterè pi fò moun nan peyi a.

**Nimewo 36-4:** Moun ki mèt yon tè, fèt pou l travay li, pou l fè l bay rannman, pou li okipe l yon jan pou dlo pa bwote tè a ale. Lalwa prewwa pinisyon pou lè sa pa fèt.

**Nimewo 36-5:** Pèsonn moun pa gen dwa mèt bò lanmò, sous, rivyè, bouchi, tèt dlo, ak richès ki anndan vant tè a (\*3). Tout kote sa yo, fèt pou itil tout Ayisyen. Se byen Leta.

**Nimewo 36-6:** Lalwa regle nan ki kondisyon, moun va lib chèche konnen kouman pou yo fè richès ki anndan vant tè a, bay bon rannman. Lalwa regle nan ki kondisyon, moun va lib fè richès ki anndan vant tè a, bay bon rannman vre, kit min yo fon kit min yo pa fon anndan vant tè a. Lalwa regle ki avantaj ni moun k ap travay pou min sa yo bay bon rannman, ni Leta ki ba yo dwa fè travay sa a, dwe kapab jwenn.

**Nimewo 37:** Lalwa regle nan ki kondisyon pwogram Leta pou separe tè bay abitan yo, dwe fèt, nan avantaj tout gwoup moun kote pwogram sa a ap mache, ni nan separe tè, ni nan kole bout tè ansanm.

**Nimewo 38:** Lalwa la pou li pwoteje ni travay moun save fè, ni travay moun ki ekri liv fè, ni travay sanba ak atis fè.

**Nimewo 39:** Premye moun ki fèt pou yo jwenn dwa travay tè Leta genyen, se moun ki rete nan seksyon kominal, kote tè sa yo ye.

## **Paragrap 9** **Moun gen dwa jwenn bon enfòmasyon**

**Nimewo 40:** Leta dwe sèvi ak radyo, ak jounal, ak televizyon pou li gaye bon enfòmasyon, an kreyòl ak an franse, sou tou sa ki an rapo ak vi peyi a. An wetan sa ki ta yon danje pou peyi a, Leta dwe bay enfòmasyon sou lwa, sou dekrè ak sou regleman li mete deyò. Menm jan tou, pou antant, kontra, ak papye li siyen ak lòt peyi.

## **Paragrap 10** **Moun gen dwa viv an pè, nan peyi a**

**Nimewo 41:** Yo pa gen dwa egzile okenn sitwayen Ayisyen. Ni yo pa gen dwa fòse okenn sitwayen Ayisyen kite peyi li, pou okenn kòz. Yo pa gen dwa fè yon Ayisyen pa Ayisyen ankò, pou yon kòz politik. Dwa lalwa ba li yo, yo pa gen dwa retire yo nan men l, pou yon kòz politik.

**Nimewo 41-1:** Okenn Ayisyen pa bezwen viza ni pou soti nan peyi a, ni pou retounen.

**Nimewo 42:** Yo pa gen dwa voye okenn sitwayen, kit li sivil, kit li militè, devan okenn lòt jij, pase jij ki la pou sa, dapre konstitisyon an ak lalwa.

**Nimewo 42-1:** Si yo akize yon militè kòmwa li fè krim trayi peyi li, se tribunal yo rele tribunal dwa komen an, ki dwe jije militè sa a.

**Nimewo 42-2:** Men ki kòz yon tribunal militè gen dwa jije ase:

- 1) Kòz militè ki fè kichòy kont sa ki nan manyèl jistis militè a.
- 2) Kòz ant manm fòs Ame d Ayiti.
- 3) Kòz militè pandan peyi a nan lagè.

**Nimewo 42-3:** Se tribunal yo rele tribunal dwa komen, ki jije tout kòz ant sivil ak militè, lè se nan pye travay li yon militè fè yon zak kont yon sivil, tankou: abi, kraze zo, krim.

**Nimewo 43:** Yo pa gen dwa rantre kay moun ni yo pa gen dwa pran papye moun, san se pa pou yon rezon lalwa prevwa, ak jan lalwa di sa dwe fèt.

**Nimewo 44:** Prizonye ki ap tann jijman, pa fèt pou yo ansanm ak prizonye yo deja kondane.

**Nimewo 44-1:** Moun ki nan prizon fèt pou yo jwenn menm respè lalwa mande pou tout kretyen vivan, nan jan yo dwe sèvi avèk yo a.

**Nimewo 45:** Se lalwa sèlman ki gen dwa di ni ki pinisyon yo prevwa pou yon zak, ni nan ki ka ak nan ki kondisyon yo dwe aplike pinisyon sa a.

**Nimewo 46:** Lè gen krim, lè gen fòt, lè gen kontravansyon, yo pa kapab fòse yon moun sèvi temwen kont pwòp tèt pa li ou byen kont paran I, kit se fanmi pre (rive jis katriyèm degre), kit se fanmi paralyans (rive jis dezyèm degre).

**Nimewo 47:** Yo pa gen dwa fòse pèsonn moun leve lamen, san se pa pou yon rezon lalwa prevwa ak jan lalwa di sa dwe fèt.

**Nimewo 48:** Leta va fè yon jan pou yo mete yon kès pansyon ni pou moun ki nan plas Leta, ni pou moun ki nan plas ki pa plas Leta. Kès sa a ap fèt ak lajan ni patwon ni anplwaye va mete a kote pou sa, selon sa lalwa di sou sa. Lajan pansyon, se pa yon favè yo fè moun ki travay, se yon dwa yo genyen.

**Nimewo 49:** Moun gen dwa ekri lèt lib, san pa gen kontwòl. Menm jan tou, moun gen dwa kominiye lib, jan yo vle, ak lòt moun san pa gen kontwòl. Se sèl lajistik ki ta gen dwa fè yon kontwòl, lè lalwa ba I pèmisyon pou sa, ak jan lalwa prevwa sa kapab fèt. Men, fòk lajistik bay bon rezon ki fè li deside pou sa fèt.

**Nimewo 50:** Lè y ap jije krim kote san koule ak lè y ap jije fòt pou kòz politik, konstitisyon an ak lalwa di, fòk gen yon jiri (\*4).

**Nimewo 51:** Yon lwa pa vo pou yon kòz yo ta jije anvan lwa sa a parèt, sòf si se yon lwa yo rele lwa penal, e ki ta an favè moun yo akize a.

### Chapit 3 Ki sa yon sitwayen dwe fè

**Nimewo 52:** Lè yon moun sitwayen toutbon, li o sèvis peyi li. Chak dwa li genyen, mare ak kichòy li dwe fè, pou I pwoteje dwa sa a.

**Nimewo 52-1:** Yon sitwayen tout bon, degaje I tout jan, pou li toujou fè tou sa li dwe fè pou Leta ak pou pèp li, ni nan jan li kondui tèt li, ni nan sèvis peyi I, ni nan jan li sèvi ak lòt moun nan peyi a, ni nan koze lajan. Men ki sa yon sitwayen toutbon dwe fè:

- 1 ) Li dwe respekte konstitisyon an ak drapo peyi a.
- 2) Li dwe respekte lalwa.
- 3) Li dwe vote nan eleksyon, san yo pa fòse I.
- 4) Li dwe peye taks.
- 5) Li dwe dakò pou li sèvi kòm manm jiri, nan tribunal.

- 6) Li dwe defann peyi I, si gen lagè.
- 7) Li dwe chèche konnen, epi chèche ogmante konesans li
- 8) Li dwe bay konkou I nan pwòpte peyi a, nan pwoteje tè a, ak tou sa ki alantou tè a.
- 9) Li dwe sansib anpil pou lajan Leta ak pou byen Leta.
- 10) Li dwe respekte byen lòt moun.
- 11) Li dwe travay pou tout moun viv an pè.
- 12) Li dwe toujou prêt pou li bay konkou, lè moun an danje.
- 13) Li dwe respekte dwa ak libète lòt moun.

**Nimewo 52-2:** Lè yon sitwayen pa fè, sa I dwe fè, lalwa gen dwa pini I.

**Nimewo 52-3:** Fi ak gason oblige pase nan yon pwogram sèvis peyi a. Lalwa regle nan ki kondisyon pwogram sa a mache.

### **Katriyèm Pati Konstitisyon an Sou: Etranje**

**Nimewo 53:** Lalwa regle nan ki kondisyon etranje gen dwa randre nan peyi a, e nan ki kondisyon yo gen dwa rete ladan I.

**Nimewo 54:** Etranje ki nan peyi a, gen dwa jwenn menm pwoteksyon lalwa bay sitwayen Ayisyen yo.

**Nimewo 54-1:** Yon etranje gen tout dwa sivil li. Menm jan tou pou dwa moun genyen kòm moun, nan peyi a, ak dwa moun genyen nan afè lajan. Etranje sou zòd regleman lalwa mete: nan afè gen byen ak kay, nan afè gen yon plas ou byen nan afè travay nan yon metye, nan afè fe komès an gwo, nan afè gen yon ajans komès, nan afè fè machandiz antre soti nan peyi a.

**Nimewo 55:** Yon etranje ki rezide ann Ayiti, gen dwa gen yon kay pou li rete.

**Nimewo 55-1:** Men, yon etranje ki rezide ann Ayiti, pa gen dwa gen plis pase yon kay pou li rete, nan yon awondisman. Li pa janm gen dwa randre nan komès lwe kay. Lalwa prevwa de regleman espesyal pou konpayi etranjè k ap okipe afè bati kay.

**Nimewo 55-2:** Etranje ak konpayi etranjè ki rete ann Ayiti, gen dwa gen pwopriyete pa yo, kit se pou pèmèt yo fè travay lalwa ba yo pèmisyon fè nan peyi a, jan lalwa ba yo I la. Kit se pou travay tè, kit se pou komès, kit se pou endistri, kit se pou reliyion, kit se pou pote moun sekou, kit se pou ede moun jwenn konesans.

**Nimewo 55-3:** Okenn etranje pa gen dwa gen kay ki rive sou fwontyè peyi a.

**Nimewo 55-4:** Dwa yon etranje genyen, lè li rete ann Ayiti, pa vo ankò, senk (5) ane apre etranje a pa rete nan peyi a ankò. Menm bagay tou, pou konpayi etranjè yo, apre yo sispann fè travay, yo te ba yo pèmisyon fè nan peyi a, selon kondisyon lalwa mete pou yo remèt byen etranje oubyen pou yo likide yo.

**Nimewo 55-5:** Lalwa pini moun ki pa obeyi regleman sa yo, ansanm ak moun ki nan konfyolo avèk yo, pou sa.

**Nimewo 56:** Lalwa regle nan ki kondisyon, yo gen dwa mete yon etranje deyò nan peyi a, lè I foure bouch li nan vi politik peyi a.

**Nimewo 57:** Refijye politik gen dwa jwenn azil politik nan peyi a.

### **Senkyèm Pati Konstitisyon an Sou: sa ki fè peyi d Ayiti mèt tèt li**

**Nimewo 58:** Sa ki fe peyi d Ayiti mèt tèt li, se nan tout sitwayen yo, sa chita. Se nan men tout sitwayen yo, sa soti.

Men nan ki sikontans chak sitwayen sèvi ak dwa sitwayen yo, dirèk:

1 ) Nan eleksyon Prezidan Repiblik la.

2) Nan eleksyon manm lachanm.

3) Nan eleksyon manm tout lòt gwoup, konstitisyon an ak lalwa mete eleksyon pou yo chwazi yo.

**Nimewo 59:** Gen twa (3) gwoup moun, sitwayen yo mete la, pou gwoup sa yo gen dwa fè peyi d Ayiti mache, o non sitwayen yo, kòm yon peyi ki mèt tèt li. Se:

1) Gwoup moun ki gen pouvwa fè lwa pou peyi a.

2) Gwoup moun ki gen pouvwa dirije peyi a.

3) Gwoup moun ki gen pouvwa jij nan peyi a.

Chak gwoup sa yo endepandan. Youn pa sou zòd lòt. Konstitisyon an klè sou sa.

**Nimewo 59-1:** Se sou twa (3) gwoup sa yo Leta Ayisyen chita. Se nan men twa gwoup sivil sa yo, sitwayen yo mete tout pouvwa Leta genyen.

**Nimewo 60:** Chak gwoup sa yo endepandan. Youn pa sou zòd lòt, nan travay yo chak, yo gen pou yo fè, bò pa yo.

**Nimewo 60-1:** Okenn nan twa gwoup sa yo, pa janm gen dwa bay youn nan 2 lòt yo, fè pwòp travay pa li, pou okenn rezon. Li pa gen dwa bay youn nan 2 lòt yo fè, ni tout travay pa li, ni moso ladan. Chak gwoup fèt pou yo rete nan wòl yo, jan Konstitisyon an ak lalwa di sa dwe fèt.

**Nimewo 60-2:** Chak gwoup, sèl reskonsab pwòp travay pa yo.

## Chapit 1

### Peyi a divize an zòn Pouvwa Leta pa fèt pou I chita nan men yon sèl ti ponyen moun.

**Nimewo 61:** Peyi a divize an zòn. Men sa ki fòme yon zòn peyi a: seksyon kominal, komin, depatman.

**Nimewo 61-1:** Lalwa gen dwa kreye lòt zòn na peyi a.

### Paragraf 1 Seksyon Kominal

**Nimewo 62:** Se seksyon kominal la, ki pi piti moso, nan yon zòn peyi a, pou administrasyon Leta a.

**Nimewo 63:** Chak seksyon kominal gen yon konsèy twa (3) manm a latèt yo. Tout pèp la nonmen twa (3) manm sa yo, nan eleksyon chak 4 an. Yo toujou gen dwa double.

Lalwa deside kouman pou seksyon kominal la òganize ak kouman pou I mache.

**Nimewo 63-1:** Gen yon asanble seksyon kominal, ki la pou I ede konsèy administrasyon seksyon kominal la, nan travay li.

**Nimewo 64:** Leta dwe degaje I pou chak seksyon kominal rive jwenn tout mwayer pou yo bay bon fòmasyon. Fòk tout moun nan seksyon an, kapab aprann travay nan avantaj peyi a, nan byen viv, youn ak lòt, nan koze lajan, nan sèvi ak richès ki nan sèvo ak nan lide pèp la.

**Nimewo 65:** Men nan ki kondisyon yon moun gen dwa vin manm konsèy administrasyon yon seksyon kominal:

- 1) Fòk li Ayisyen, e fòk li gen vennsenk (25) ane pou pi piti.
- 2) Fòk li te rete de (2) ane nan seksyon kominal la, anvan eleksyon an, e fòk li kontinye rete la toujou.
- 3) Fòk li gen tout dwa sivil li ak tout dwa politik li. E, fòk li pa te janm jwenn okenn pinisyon grav ou byen okenn pinisyon pou l ta wont, nan men okenn jij.

## Paragraf 2 Komin

**Nimewo 66:** Chak komin fèt pou yo granmoun lakay yo, ni pou administrasyon, ni pou koze lajan. Chak komin peyi a, gen yon konsèy twa manm, a latèt yo. Yo rele konsèy sa a konsèy minisipal. Tout pèp nan komin nan, nonmen konsèy sa a, nan eleksyon.

**Nimewo 66-1:** Yo rele prezidan konsèy sa a majistra kominal. Li majistra kominal adjwen, pou ede l nan travay li.

**Nimewo 67:** Gen yon asanble minisipal, ki la pou l ede konsèy minisipal la nan travay li. Asanble sa a gen yon reprezantan chak seksyon kominal gen majistra ladan l, espesyalman.

**Nimewo 68:** Yo nonmen manm konsèy minisipal yo nan eleksyon chak 4 an. Yo toujou gen dwa double.

**Nimewo 69:** Lalwa deside kouman pou konsèy minisipal la òganize ak kouman pou li mache.

**Nimewo 70:** Men nan ki kondisyon yon moun gen dwa vin manm konsèy minisipal:

- 1) Fòk li Ayisyen.
- 2) Fòk li deja gen vennsenk (25) ane.
- 3) Fòk li gen tout dwa sivil li ak tout dwa politik li.
- 4) Fòk li pa te janm jwenn okenn pinisyon grav ou byen okenn pinisyon pou l ta wont, nan men okenn jij.
- 5) Fòk li te rete omwen depi twa (3) ane nan komin nan, e fòk li fè desizyon l pou li rete ladan l, pandan tout tan li manm konsèy minisipal la.

**Nimewo 71:** Chak konsèy minisipal gen dwa mande administrasyon santral peyi a, ba l yon konsèy ki fòme ak teknisyen.

**Nimewo 72:** Men pou ki rezon, yon tribinal ki la pou sa, gen dwa deklare yon konsèy minisipal vin kraze, legal:

- 1) Si gen twòp lese grennen.
- 2) Si gen vòlè.
- 3) Si konsèy minisipal la sou visye nan travay li.

Lemoman tribinal la deklare konsèy minisipal la kraze, konsèy depatman an, ranplase konsèy minisipal la, tousuit. Anvan swasant (60) jou pase, apre yo deklare konsèy minisipal la kraze, konsèy depatman an avèti konsèy elektoral ki la nèt la. Se yon jan pou eleksyon kab fèt, pou yon nouvo konsèy minisipal vin okipe travay komin nan, jis dat pwochen eleksyon regilyè yo rive. Y a toujou fè menm jan tou, depi vin manke youn nan manm konsèy minisipal la, pou nenpòt ki rezon.

**Nimewo 73:** Se nan avantaj komin nan tou sèl, konsèy minisipal la fèt pou li okipe byen komin nan. Li rann asanble minisipal la kont, sou travay li fè. Asanble minisipal la, bò pa li, voye rapò bay konsèy depatman an.

**Nimewo 74:** Se konsèy minisipal la ki la, an premye, pou li okipe tè ak byen Leta, nan komin nan. Yo pa gen dwa fè okenn afè ak byen osinon ak tè Leta sa yo, san asanble minisipal la, pa di mo pa I nan sa, anvan.

### **Paragrapf 3 Awondisman**

**Nimewo 75:** Awondisman kapab divize an divès komin, pou administrasyon Leta a. Lalwa deside kouman pou awondisman an òganize ak kouman pou I mache.

### **Paragrapf 4 Depatman**

**Nimewo 76:** Se depatman an ki pi gran moso, nan yon zòn peyi a, pou administrasyon Leta a. Depatman an divize ann awondisman.

**Nimewo 77:** Pou lalwa ak lajistik, depatman an, se tankou yon moun, ki gramoun lakay li.

**Nimewo 78:** Chak depatman gen yon konsèy twa (3) manm a latèt yo. Se asanble depatman an ki nommen twa (3) manm sa yo, nan elekson chak 4 an.

**Nimewo 79:** Yo pa oblige chwazi manm konsèy depatman an, nan manm asanble depatman an. Men nan ki kondisyon yon moun gen dwa vin manm konsèy depatman:

- 1) Fòk li Ayisyen e fòk li gen vennsenk (25) ane pou pi piti.
- 2) Fòk li te rete omwen depi twa (3) ane nan depatman an, anvan elekson yo, e fòk li fè desizyon I pou li rete nan depatman an tout tan li manm konsèy depatman an.
- 3) Fòk li gen tout dwa sivil li ak tout dwa politik li e, fòk li pa te janm jwenn okenn pinisyon grav, ou byen okenn pinisyon pou I ta wont, nan men okenn jij.

**Nimewo 80:** Gen yon asanble depatman, ki la pou li ede konsèy depatman an nan travay li. Asanble depatman an fòme ak yon reprezantan chak asanble minisipal.

**Nimewo 80-1:** Men ki moun ki gen dwa vin bay opinyon yo, nan reyinyon asanble depatman an:

- 1) Depite ak senatè depatman an.
- 2) Yon reprezantan chak asosiyasyon sosyo-pwofesyonèl ak chak sendika, nan depatman an.
- 3) Delege depatman an.
- 4) Direktè sèvis Leta, nan depatman an.

**Nimewo 81:** Konsèy depatman an, mete ansanm ak administrasyon santral peyi a, pou yo kalkile tout mwayen ki va mete depatman an nan wout pwogrè.

**Nimewo 82:** Lalwa deside kouman pou konsèy depatman an òganize ak kouman pou li mache. Menm jan tou, pou asanble depatman an.

**Nimewo 83:** Se nan avantaj depatman an tou sèl, konsèy depatman an fèt pou li okipe byen depatman an. Li rann asanble depatman an kont, sou travay li fè. Asanble depatman an, bò pa li, voye rapò bay administrasyon santral peyi a.

**Nimewo 84:** Men pou ki rezon, yon tribinal ki la pou sa, gen dwa deklare yon konsèy depatman vin kraze, legal:

- 1) Si gen twòp lese grennen.
- 2) Si gen volè.
- 3) Si konsèy depatman an sou visye nan travay li.

Lemoman tribinal la deklare konsèy depatman an kraze, administrasyon santral peyi a nonmen yon komite pwovizwa. Anvan swasant (60) jou pase, apre yo deklare konsèy depatman an kraze, administrasyon santral peyi a avèti konsèy elektoral ki la nèt la. Se yon jan pou elekson kab fêt, pou yon nouvo konsèy depatman, jis dat pwochen elekson regilyè yo rive.

## **Paragrap 5**

### **Delege ak adjwen delege**

**Nimewo 85:** Nan chak chèf-lye depatman, gouvènman an nonmen yon reprezantan, yo rele delege. Nan chak chèf-lye awondisman, yo nonmen yon adjwen, ki sou zòd delege a. Yo rele adjwen sa a, adjwen delege.

**Nimewo 86:** Travay delege ak adjwen delege, se kontwole sèvis Leta yo epi mete tèt ansanm ladan yo. Yo pa gen pou yo fè okenn travay lapolis, nan mete lòd. Lalwa deside ki lòt travay delege ak adjwen delege gen pou yo fè.

## **Paragrap 6**

### **Konsèy tout depatman yo**

**Nimewo 87:** Gen yon konsèy tout depatman yo ki la pou li ede gouvènman an. Se chak asanble depatman yo ki nommen yon reprezantan nan konsèy sa a.

**Nimewo 87-1:** Reprezantan yo chwazi nan manm asanble depatman yo, va fè va e vyen ant depatman an ak gouvènman an.

**Nimewo 87-2:** Konsèy tout depatman yo, va mete ansanm avèk gouvènman an, pou yo kalkile tout mwayen ki va mete peyi a sou wout pwogrè, yon jan pou pouvwa Leta pa chita yon sèl kote. Men sou ki sa pou yo travay pi plis: sou jan youn sèvi ak lòt, nan peyi a, sou afè lajan, sou komès, sou travay tè, sou endistri.

**Nimewo 87-3:** Konsèy tout depatman yo gen dwa la, lè konsèy minis yo ap travay, depi se sou yon koze yo jwenn nan nimewo 87-2 a. Li gen dwa vote, depi gen vòt.

**Nimewo 87-4:** Menm jan pouvwa Leta pa fèt pou I rete nan men yon ti ponyen moun, se konsa tou, tout sèvis Leta pa fèt pou yo chita menm kote. Pouvwa ak sèvis Leta fèt pou yo separe yo, yon jan pou yo nan avantaj tout depatman yo. Menm jan tou, chak endistri pa kapab klere pou sèl gress je yo. Fòk gen tèt ansanm.

**Nimewo 87-5:** Lalwa deside kouman pou konsèy tout depatman yo òganize, ak kouman pou yo mache. Lalwa deside tou konbyen fwa konsèy tout depatnan yo fèt pou yo fe reyinyon ak konsèy minis yo.

## **Chapit 2**

### **Gwoup moun ki gen pouvwa fè lwa pou peyi a**

**Nimewo 88:** Gwoup moun ki gen pouvwa fè lwa pou peyi a, se lachanm. Se nan men lachanm pèp la mete pouvwa fè lwa pou peyi a. Gen lachanm depite ak lachanm senatè, ki fòme lachanm.

**Nimewo 89:** Lachanm depite, se yon gwoup moun tout sitwayen yo nonmen nan elekson. Pèp la bay gwoup moun sa yo, pouvwa fè lwa, o non pèp la, ansanm ak lachanm senatè.

**Nimewo 90:** Chak kote k gen yon konsèy minisipal, fòme yon zòn ki kapab nonmen yon depite nan elekson.

Lalwa deside konbyen depite ki dwe genyen kote k gen anpil anpil moun. Men, kote sa yo pa gen dwa gen plis pase twa (3) depite.

Ann atandan yo fin mete regleman eleksyon yo dakò ak nimewo sa a, pi piti depite pou lachanm genyen, se swasanndis (70).

**Nimewo 90-1:** Eleksyon depite dwe fèt nan kondisyon ak nan fason lwa elektoral la di sa dwe fèt. Pou eleksyon an bon, fòk moun ki pase depite jwenn mwatye vòt yo, plis yon lòt vòt, pou pi piti.

**Nimewo 91:** Men nan ki kondisyon yon moun gen dwa vin depite lachanm:

1) Fòk li Ayisyen natif natal (\* Gade paj 202). Epi, fòk li pa te janm pa Ayisyen ankò.

2) Fòk li déjà gen vennsenk (25) ane.

3) Fòk li gen tout dwa sivil li ak tout dwa politik li. E, fòk li pa janm jwenn okenn pinisyon grav ou byen okenn pinisyon pou I ta wont, nan men jij ki jije krim yo rele krim dwa komen.

4) Fòk li te rete omwen de (2) ane, youn dèyè lòt, anvan eleksyon an, nan zòn kote li vle depite a.

5) Fòk li gen omwen yon kay nan zùn sa a, ou byen fòk li travay la, nan yon metye ousinon nan yon endistri.

6) Fòk li gen papye ofisyèl li, kòmkwa li an règ ak Leta, si li te reskonsab lajan Leta.

**Nimewo 92:** Yo nonmen depite yo nan eleksyon chak 4 an. Yo toujou gen dwa double.

**Nimewo 92-1:** Depite yo rantre lachanm dezyèm lendi mwa d janvye. Lachanm depite travay pandan 2 peryòd, chak ane. Tan sèvis depite a, konte pou yon epòk sèvis lachanm.

**Nimewo 92-2:** Premye peryòd lachanm travay, kòmanse dezyèm lendi mwa d janvye, jis dezyèm lendi mwa d me. Dezyèm peryòd la kòmanse dezyèm lendi mwa d jen, jis dezyèm lendi mwa sektanm .

**Nimewo 92-3:** Se pou yo chanje tout depite lachanm chak 4 an.

**Nimewo 93:** An wetan travay fè lwa, konstitisyon an bay lachanm depite fè, tankou lachanm senatè, men ki sa lachanm depite gen dwa fè toujou: depi sou chak twa (3) depite, gen de (2) ki dakò pou sa, lachanm depite gen dwa al lajistik ni pou prezidan ni pou Premye Minis, ni pou minis, ni pou sekretè d Eta. Jijman an ap fòt devan yon gwo tribunal espesyal, ki la pou sa dirèk. Konstitisyon an ak lalwa regle tout lòt travay depite yo ta gen pou yo fè.

## Paragraf 2 Senatè

**Nimewo 94:** Lachanm senatè, se yon gwoup moun tout sitwayen yo nonmen nan eleksyon. Pèp la bay gwoup moun sa yo pouvwa fè lwa, o non pèp la, ansanm ak lachanm depite.

**Nimewo 94-1:** Gen twa (3) senatè pou chak depatman.

**Nimewo 94-2:** Eleksyon senatè dwe fèt nan kondisyon ak nan fason lwa elektoral la di sa dwe fèt. Pou eleksyon an bon, fòk moun ki pase senatè jwenn mwatye vòt yo, plis yon lòt vòt, pou pi piti, nan eleksyon ki fèt nan chak depatman yo.

**Nimewo 95:** Yo nonmen senatè yo nan eleksyon chak siz (6) an. Yo toujou gen dwa double.

**Nimewo 95-1:** Lachanm senatè toujou sou travay.

**Nimewo 95-2:** Men, li kapab fè yon kanpe, sòf pandan 2 peryòd travay lachanm depite yo. Lè lachanm senatè fè yon kanpe, fò I genyen yon komite ki toujou la, pou li regle detay tou lè jou yo. Komite sa a pa gen dwa fè okenn desizyon, sòf pou I ta mande yon reyinyon lachanm senatè.

Si gen ka sikonstans, gouvènman an tou, gen dwa mande yon reyinyon lachanm senatè, ata pandan yo fè yon kanpe

**Nimewo 95-3:** Tou lè dezan (2 an), yo chanje yon (1) senatè sou chak twa (3) senatè lachanm.

**Nimewo 96:** Men nan ki kondisyon yon moun gen dwa vin senatè:

- 1) Fòk li Ayisyen natif natal. Epi, fòk li pa te janm pa Ayisyen ankò.
- 2) Fòk li deja gen trant (30) ane.
- 3) Fòk li gen tout dwa sivil li ak tout dwa politik li. E, fòk li pa janm jwenn okenn pinisyon grav ou byen okenn pinisyon pou l ta wont, nan men jij ki jije krim yo rele krim dwa komen.

4) Fòk li te rete omwen kat (4) ane youn dèyè lòt, anvan eleksyon an, nan depatman li vle senatè ladan l nan.

5) Fòk li gen omwen yon kay nan depatman an, ou byen fòk li travay la, nan yon metye ousinon nan yon endistri.

6) Fòk li gen papye ofisyèl li, kòmkwa li an règ ak Leta, si li te reskonsab lajan Leta.

**Nimewo 97:** An wetan travay fè lwa, konstitisyon an bay lachanm senatè fè, tankou lachanm depite, men ki sa lachanm senatè gen dwa fè toujou:

- 1) Li prezante gouvènman an lis jij pou tiibinal kasasyon selon sa konstitisyon an mande.
- 2) Li tounen yon gwo tribunal espesyal (\*6).
- 3) Li fè tout lòt travay konstitisyon sa a ak lalwa ba l fè.

### **Paragraf 3** **Asanble nasyonal**

**Nimewo 98:** Lè de (2) gwoup moun ki gen pouvwa fe lwa pou peyi a vin sèl gwoup, yo rele sa: "Asanble Nasyonal".

**Nimewo 98-1:** Reyinyon asanble nasyonal la dwe fèt nan kòmansman ak nan finisman chak peryòd travay lachanm. Li fèt tou, chak fwa konstitisyon an mande sa.

**Nimewo 98-2:** Sèl pouvwa asanble nasyonal la genyen, se pouvwa fè travay konstitisyon an ba l fè ase. Ni li pa gen dwa okipe lòt koze .

**Nimewo 98-3:** Men ki wòl asanble nasyonal la genyen:

- 1) Se devan l, prezidan an leve lamen pou l sèmante l ap respekte konstitisyon an.
- 2) Asanble nasyonal la dwe di, si l dakò pou peyi a deklare lagè, apre tout demach pou lagè pa deklare, kaba.
- 3) Li dwe di si li dakò ou byen si li pa dakò pou yo siyen antant ak kontra ak lòt peyi.
- 4) Se li ki dwe mete konstitisyon an pi an fòm, selon jan yo prevwa sa, nan konstitisyon an.
- 5) Li dwe di si li dakò lè gouvènman an ta fè desizyon l pou l al chita yon lòt kote, selon sa yo jwenn nan premye nimewo konstitisyon an.
- 6) Li dwe deside si wi ou non, gouvènman an gen dwa deklare eta d syèj. Li dwe deside, ansanm ak gouvènman an, ki nimewo yo gen dwa pa aplike, nan konstitisyon an, epi pandan konbyen tan sa gen dwa fêt.
- 7) Li dwe bay konkou l, pou yo fòme konsèy elektoral ki la nèt la, jan sa ekri nan nimewo 192 konstitisyon an.
- 8) Se devan l, gouvènman an dwe vin bay kontrandi sou tou sa li fè, nan kòmansman chak peryòd travay lachanm .

**Nimewo 99:** Se prezidan lachanm senatè ki dirije asanble nasyonal la, nan travay li. Prezidan lachanm depite ede I, kòm vis-prezidan. Sekretè lachanm senatè ak sekretè lachanm depite, se yo ki sekretè asanble nasyonal la.

**Nimewo 99-1:** A sipozisyon prezidan lachanm senatè vin gen yon lekontrè, se prezidan lachanm depite ki ranplase I, a latèt asanble nasyonal la. Se vis-prezidan lachanm senatè atò, ki vin visprezidan asanble nasyonal la.

**Nimewo 99-2:** Sizanka tou lè de (2) prezidan yo ta vin gen yon lekontrè, se de (2) vis-prezidan yo, ki va ranplase yo chak.

**Nimewo 100:** Tout moun gen dwa asiste reyinyon asanble nasyonal la. Men, yo gen dwa pa fè yo an publik, depi senk (5) manm asanble a mande sa. Apre sa, pi fò manm nan asanble a va deside si yo dwe rekòmanse reyinyon an devan tout moun.

**Nimewo 101:** Si gen ka sikontans, gouvènman an gen dwa mande pou asanble nasyonal la fè yon reyinyon espesyal, lè se pa pandan peryòd travay lachanm.

**Nimewo 102:** Asanble nasyonal la pa gen dwa fè okenn reyinyon ni li pa gen dwa fè okenn desizyon san pi fò manm lachanm depite ak pi fò manm lachanm senatè pa la.

**Nimewo 103:** Se Pòtoprens lachanm chita. Men yo kapab tabli I menm kote ak gouvènman an, lemoman yo ta vin tabli gouvènman an yon lòt kote.

#### **Paragraf 4**

#### **Kouman gwooup moun ki gen pouvwa fè lwa nan peyi a dwe travay**

**Nimewo 104:** Peryòd travay lachanm kòmanse menm jou lachanm depite ak lachanm senatè vin fè yon sèl, pou yo fòme asanble nasyonal la.

**Nimewo 105:** Lè se pa nan peryòd travay lachanm, Prezidan Repiblik la gen dwa mande lachanm yon reyinyon espesyal, si gen ka sikontans.

**Nimewo 106:** Se yon mesaj chèf gouvènman an ki esplike pou ki rezon yo mande reyinyon sa a.

**Nimewo 107:** Lè yo mande lachanm yon reyinyon espesyal, lachanm pa gen dwa fè okenn desizyon pou okenn lòt kòz, pase pou kòz ki fè, yo te mande reyinyon an.

**Nimewo 107-1:** Sa pa vle di, yon senatè ou byen yon depite, pa gen dwa fe lachanm depite ou byen lachanm senatè tandem sa li panse sou nenpèt lòt koz ki enterese tout moun.

**Nimewo 108:** Lachanm depite kontwole si yon depite gen dwa fè travay depite I. Se apre kontwòl sa a, yon depite vin gen dwa fè travay depite I. Lachanm senatè dwe fè menm jan tou, pou chak senatè, anvan pou yo gen dwa fè travay senatè yo. Se sèl lachanm depite ak lachanm senatè ki gen dwa regle diskisyon ki ta leve sou sa.

**Nimewo 109:** Men ki pawèl, ni manm lachanm senatè, ni manm lachanm depite pale, lè yo leve lamen: *"Mwen sèmante m ap fè travay pwoteje dwa pèp la ak travay obeyi konstitisyon an, jan mwen dwe fè I la."*

**Nimewo 110:** Tout moun gen dwa asiste reyinyon ni lachanm senatè ni lachanm depite. Men, ni lachanm senatè, ni lachanm depite gen dwa pa reyinyon yo an publik, depi senk (5) senatè ou byen senk (5) depite mande sa. Apre sa, pi fò manm ni lachanm senatè, ni lachanm depite va deside si yo dwe rekòmanse reyinyon an devan tout moun.

**Nimewo 111:** Lachanm gen dwa fè lwa pou tout kòz ki enterese tout moun.

**Nimewo 111-1:** Ni lachanm senatè, ni lachanm depite, ni gouvènman an gen dwa mande fè lwa pou yon kòz.

**Nimewo 111-2:** Men, se gouvènman an tou sèl, ki gen dwa mande fè lwa pou kòz sa yo:

1) Lwa pou fikse lajan Leta gen pou I resevwa, ak lajan Leta gen pou I depanse. Yo rele lwa sa a, lwa sou bidjè Leta.

2) Lwa pou fikse valè lajan chak moun dwe peye kòm enpo, ak lwa pou fikse kouman Leta dwe touche lajan enpo sa a, ak lòt lajan kontribisyon.

3) Lwa pou mete dwa sou machandiz ou byen pou ogmante dwa sa yo.

4) Lwa pou ogmante depans Leta.

Apre gouvènman an prezante demann pou fè lwa sa yo, lachanm depite gen pou I vote yo an premye.

**Nimewo 111-3:** Sizanka lachanm senatè pa antann li ak lachanm depite sou lwa yo fè pale de yo, nan nimewo II 1-2 a, yo va prezante yon lis manm ni pou lachanm senatè, ni pou lachanm depite. Ya pran menm valè senatè ak menm valè depite nan non ki sou lis la, pou yo fòme yon komite lachanm, ki gen pou I regle keksyon sa a nèt.

**Nimewo 111-4:** Sizanka se sou kèk lòt lwa, lachanm senatè pa antann li ak lachanm depite, yo va ranvwaye vòt lwa sa a, pou lòt peryòd travay lachanm nan. Si, ata apre manm lachanm yo ta vin chanje, lachanm senatè ak lachanm depite pa antann yo sou lwa sa a toujou, yo va prezante yon lis manm ni pou lachanm senatè, ni pou lachanm depite. Ya pran menm valè senatè ak menm valè depite nan non ki sou lis la, pou yo fòme yon komite lachanm. Travay komite sa a, se tounen ekri lwa sa a, anvan yo mande ni lachanm senatè, ni lachanm depite, vote li. Ya kòmanse ak lachanm ki te déjà premye vote lwa a, anvan. Si sa pa bay anyen, y a kite afè lwa sa a.

**Nimewo 111-5:** A sipozisyon gwoup moun ki gen pouvwa fè lwa pou peyi a, ak gwoup moun ki gen pouvwa dirije peyi a, pa antann yo, youn nan gwoup yo, va pote kòz la devan yon komite ki la pou I ranje sa, jan yo ekri I, nan nimewo 206 la.

**Nimewo 111-6:** Sizanka komite a pa reyisi fè de (2) gwoup yo antann yo, I a drese yon pwosè-vèbal, kòmwa pa gen antant. L a remèt de (2) gwoup yo, pwosè-vèbal sa a. Lè fini, I a avèti tribinal kasasyon an.

**Nimewo 111-7:** Anvan ui (8) jou pase, apre tribinal kasasyon an resevwa pwosè-vèbal la, tribinal kasasyon an pran kòz la sou kont li Tout manm tribinal kasasyon an va mete ansanm, pou yo fè yon desizyon, san yo pa chita sou okenn lòt kòz. Tou lè de (2) gwoup yo, oblige dakò ak desizyon tribinal kasasyon an. Sizanka lachanm senatè ak lachanm depite ta vin fè yon antant anvan desizyon sa a, kòz la ta regle ak antant la san pa bezwen gen okenn lòt demach.

**Nimewo 111-8:** Yo pa janm gen dwa kraze, ni lachanm depite, ni lachanm senatè, pou okenn rezon. Ni yo pa gen dwa fòse yo sispann reyinyon yo. Ni yo pa gen dwa fè, ni yon senatè, ni yon depite depase tan sèvis li.

**Nimewo 112:** Ni lachanm senatè ni lachanm depite gen pwòp regleman pa yo. Se dapre regleman sa yo, yo nonmen pèsonèl ki va ede manm lachanm yo fè travay yo. Se nan regleman sa yo, yo jwenn ki jan, ni lachanm senatè ni lachanm depite fèt pou yo mache, pou yo travay ann òd.

**Nimewo 112-1:** Depi yon senatè ou byen yon depite pa kondui tèt li byen, lachanm senatè ou byen lachanm depite gen dwa ba I yon pinisyon. Men, fòk sou chak twa (3) senatè ou byen sou chak twa (3) depite, gen de (2) ki dakò pou sa. Sèl sa yo pa gen dwa fè se kase I, kòm senatè ou byen kòm depite.

**Nimewo 113:** Yon manm lachanm, kit li depite, kit li senatè, kapab vin pèdi dwa depite I ousinon dwa senatè I, anvan tan sèvis li fini. Sa rive lè yon jij tribinal dwa komen fin jije manm lachanm sa a, pandan tan sèvis li, epi lè li rive kondane I, pou yon kòz ki ta fè, yo pa ta gen dwa chwazi moun sa a nan eleksyon.

**Nimewo 114:** An wetan sa ki ekri pi ba, nan nimewo 115 la, yo pa gen dwa manyen manm lachanm, depi jou yo te leve lamen, kòm manm lachanm, jis jou tan sèvis yo fini.

**Nimewo 114-1:** Yo pa janm gen dwa, ni mennen yo lajistis, ni atake yo devan tribunal pou sa yo di ou byen pou j an yo vote, etan y ap fè travay manm lachanm yo.

**Nimewo 114-2:** Pandan tan sèvis yon manm lachanm, yo pa gen dwa arete I pou dèt.

**Nimewo 115:** Pandan tan sèvis yon senatè ou byen yon depite, se sèl ak pèmisyon lachanm senatè ou byen lachanm depite, yo kapab arete I pou yon krim, pou yon fot, ou byen pou yon kontravansyon ki sou kont jij tribunal dwa komen, lè se pa nan men, yo bare manm lachanm sa a, pou yon kòz ki mande yon pinisyon grav ou byen yon pinisyon pou I ta wont. Si sa rive pandan peryòd travay lachanm, yo mennen senatè a ou byen depite a devan lachanm senatè ousinon lachanm depite, san pèdi tan. Si se pa peryòd travay lachanm, y a tann kòmansman pwochenn peryòd travay lachanm nan ou byen pwochenn reyinyon espesyal li.

**Nimewo 116:** Ni lachanm senatè, ni lachanm depite pa gen dwa fè okenn reyinyon ni yo pa gen dwa fè okenn desizyon san pi fò manm lachanm yo pa la.

**Nimewo 117:** Pou yon desizyon lachanm vo kichòy, fòk se pi fò manm ki la, nan reyinyon an, ki fè desizyon sa a, sòf si konstitisyon sa a ta prevwa yon lòt bagay.

**Nimewo 118:** Ni lachanm senatè, ni lachanm depite gen dwa fè yon ankèt sou tout kòz yo mete devan yo.

**Nimewo 119:** Anvan pou yon Pwojè-Iwa tounen yon Iwa, fòk yo vote chak nimewo ki ladan I, youn dèyè lòt.

**Nimewo 120:** Ni lachanm senatè, ni lachanm depite gen dwa fè chanjman pou yo ranje pwojè-Iwa yo mande yo vote. Yo gen dwa mete plis nimewo tou. Pou chanjman sa yo rantre nan yon pwojè-Iwa, apre lachanm depite fin asepte yo, fòk lachanm senatè asepte menm chanjman sa yo, menm, jan. Ou byen okontré, si lachanm senatè te asepte chanjman sa yo anvan, fòk lachanm depite vin asepte yo, pou yo sa rantre nan yon pwojè-Iwa. Anvan pou yon pwojè-Iwa tounen yon Iwa, fòk ni pwojè lachanm senatè vote a, ni pwojè lachanm depite vote a, menm parèy.

**Nimewo 120-1:** Toutotan yo pankò fin vote yon pwojè-Iwa, yo toujou kapab kite sa.

**Nimewo 121:** Depi lachanm fin vote yon Iwa, yo dwe voye I bay Prezidan Repiblik la, anvan yo mete Iwa sa a deyò. Prezidan an gen dwa pa dakò ni ak tout Iwa a, ni ak yon pati nan Iwa a.

**Nimewo 121-1:** Lè sa rive, Prezidan Repiblik la voye Iwa a tounen lachanm senatè, si se lachanm senatè ki te vote Iwa a an premye, ou byen lachanm depite, si se lachanm depite ki te vote Iwa a an premye. Li fè yo konnen sou ki pwen li pa dakò ak Iwa a. Si se lachanm senatè ki korije Iwa a, li voye I ba lachanm depite ansanm ak pwen prezidan an pa te dakò avèk yo a. Menm jan tou, si se lachanm depite ki korije Iwa a, li voye I ba lachanm senatè.

**Nimewo 121-2:** Sizanka ni lachanm senatè, ni lachanm depite vote Iwa a, apre yo korije I, yo tounen voye Iwa a bay Prezidan Repiblik la, pou li mete Iwa a deyò.

**Nimewo 121-3:** Sizanka lachanm senatè, ki te vote Iwa a an premye, pa vle chanjman prezidan an mande, li voye I ba lachanm depite, ak pwen prezidan an pa te dakò avèk yo a. Menm jan tou, si se lachanm depite ki te vote Iwa a an premye, li voye I ba lachanm senatè

**Nimewo 121-4:** Sizanka ni lachanm senatè. ni lachanm depite pa vle chanjman prezidan an mande a, yo voye Iwa a tounen bay prezidan an. Lè sa a, prezidan an oblige mete Iwa a deyò.

**Nimewo 121-5:** Pou lachanm senatè ak lachanm depite pa asepte chanjman prezidan an mande, fòk pi fò manm lachanm yo vote menm jan, selon sa ki ekri nan nimewo 117 la. Lè, sa a, se yon vòt sekrè ki dwe fèt, ni lachanm senatè ni lachanm depite.

**Nimewo 121-6:** Si pi fò senatè yo ou byen pi fò depite yo, pa vote kont chanjman prezidan an mande, jan sa pale nan nimewo 121-5 lan, chanjman. yo pase.

**Nimewo 122:** Di jou Prezidan Republik la resevwa yon lwa, nan men lachanm, li gen ui (8) jou antye, pou I fè lachanm konnen, li pa dakò ak lwa sa a.

**Nimewo 123:** Si Prezidan Republik la pa mande okenn chanjman nan lwa a, anvan dèle ki make a fini, se pou yo pibliye lwa a, sòf si peryòd travay lachanm nan fini anvan dèle a bout. Nan ka sa a, yo ranvwaye lwa a pou pi ta. Lè pwochenn peryòd travay lachanm nan kòmanse, yo voye lwa a bay Prezidan Republik la, pou li kapab di si li pa dakò.

**Nimewo 124:** Lè ni lachanm senatè, ni lachanm depite pa asepte yon pwojè-lwa, yo pa gen dwa tounen prezante I pandan menm peryòd travay lachanm nan.

**Nimewo 125:** Apre lachanm ou byen asanble nasyonal fin vote nenpòt lwa ou byen nenpòt desizyon, fòk yo obeyi yo, yon fwa prezidan peyi a, fò yo parèt nan Jounal Ofisyèl Republik la.

**Nimewo 125-1:** Yo bay lwa a yon nimewo. Yo enprime I nan yon bilten ki gen ni mewo. Non bilten an, se: "Bilten lwa ak desizyon lachanm vote".

**Nimewo 126:** Yon lwa vin lwa toutbon jou ni lachanm senatè ni lachanm depite fin vote I nèt.

**Nimewo 127:** Pèsonn moun pa kapab monte sou tribin lachanm pou I prezante demann.

**Nimewo 128:** Se sèl gwoup moun pèp la bay pouvwa fè lwa, ki gen pouvwa esplike sans lwa yo, yon jan pou tout moun konnen se sa ou byen se pa sa. Yo bay esplikasyon sa yo an fòm yon lwa.

**Nimewo 129:** Apre yon manm lachanm fin leve lamen kòm senatè ousinon kòm depite, li gen dwa touche chak mwa nan men Leta, pou travay li.

**Nimewo 129-1:** Yon manm lachanm pa gen dwa touche, nan okenn lòt plas Leta, sof plas pwofesè.

**Nimewo 129-2:** Nenpàt manm lachanm gen dwa rele yon manm gouvènman an ou byen tout gouvènman an pou yo parèt devan lachanm. Lè sa a, manm, lachanm nan gen dwa mande keksyon sou jan administrasyon peyi a mache ak sou sa yo fe ladan.

**Nimewo 129-3:** Pou yon manm lachanm gen dwa mande keksyon, nan kondisyon sa a, fòk gen senk (5) lòt manm lachanm senatè ou byen lachanm depite ki dakò avè I pou sa. Apre yo fin mande keksyon yo, fòk lachanm senatè ou byen lachanm depite vote pou yo di si yo fè gouvènman an konfyans ousinon si yo blame I. Pou vòt la bon, fòk pi fò manm lachanm yo, vote menm jan.

**Nimewo 129-4:** Lè lachanm blame gouvènman an pou yon pwen ki nan pwogram gouvènman an ou byen pou jan gouvènman an di I ap mennen bak Leta a, fòk Premye Minis la remèt Prezidan Republik la demisyón gouvènman I nan.

**Nimewo 129-5:** Lè sa a, prezidan an oblige asepte demisyón an. Li nonmen yon lòt Premye Minis atò, jan sa make nan konstitisyon an.

**Nimewo 129-6:** Lachanm pa gen dwa fè plis pase yon vòt konsa, nan yon ane, pou I blame gouvènman an, pou yon pwen ki nan pwogram gouvènman an ou byen pou jan gouvènman an di I ap mennen bak Leta a.

**Nimewo 130:** Si yon manm lachanm mourir anvan tan sèvis li fini, ou byen si I bay demisyón I, ou byen si li vin pèdi dwa manm lachanm li, ou byen si I antrave ak lajistik, ou byen si I asepte yon plas ki pa ale ak travay manm lachanm li, fòk yo ranplase I, pou rès tan sèvis li. Si se yon depite, konsèy elektoral ki la nèt la, va konvoke moun ki gen dwa vote pou eleksyon fèt nan zòn li depite a, anvan yon mwa gen tan pase. Si se yon senatè, se menm jan tou, nan depatman I.

**Nimewo 130-1:** Eleksyon an dwe fèt anvan trant (30) jou pase, apre yo konvoke moun ki gen dwa vote pou eleksyon fet nan kote a, jan sa make nan konstitisyon an.

**Nimewo 130-2:** Se menm bagay tou, si eleksyon pa te fèt ou byen si konsèy elektoral ki la nèt la te deklare eleksyon ki te fèt nan yon zon ou byen nan plizyè zòn, pa bon.

**Nimewo 130-3:** Men, si plas yon manm lachanm vin vid, pandan dènye peryòd travay lachanm ou byen apre dènye peryòd sa a, pa gen nesesite pou eleksyon fèt pou ranplase manm lachanm sa a.

### Paragrapf 5

#### Plas ki pa ale ak travay yon manm lachanm

**Nimewo 131:** Men moun yo pa gen dwa chwazi nan eleksyon pou manm lachanm:

1) Manadjè antrepriz ki okipe sèvis Leta ou byen moun ki gen kontra ak Leta pou okipe sèvis Leta.

2) Reprezantan ou byen fonde d pouvwa moun sa yo ou sinon konpayi ak sosyete ki fè menm mòd travay avèk moun sa yo.

3) Delege, adjwen delege, jij, komisè gouvènman. sòf si tout moun sa yo ta kite plas yo si (6) mwa anvan dat eleksyon an.

4) Tout lòt moun, konstitisyon sa a ou byen lalwa deklare sitiyasyon yo pa ale ak travay yon manm lachanm.

**Nimewo 132:** Manm gouvènman ak direktè jeneral administrasyon piblik ki ta vle yo chwazi yo nan eleksyon pou manm lachanm, fèt pou yo bay demisyón yo, nan plas yo, enn (1) an pou pi piti, anvan dat eleksyon.

### Chapit 3

#### Gwooup moun ki gen pouvwa dirije peyi a

**Nimewo 133:** Men moun ak gwooup moun ki gen pouvwa dirije peyi a:

1) Prezidan Repiblik la. Yo rele I: Chèf d Eta.

2) Premye minis la, ak gouvènman I.

### Paragrapf 1

#### Sa Prezidan Repiblik la ye

**Nimewo 134:** Se tout sitwayen ki gen dwa vote, ki nonmen Prezidan Repiblik la nan eleksyon. Pou eleksyon an bon, fòk moun ki pase prezidan jwenn mwatyè vòt yo, plis yon lòt vòt, pou pi piti. Si li pa jwenn tou sa, fòk yo rekòmanse eleksyon an, yon dezyèm fwa.

Nan dezyèm eleksyon sa a, se de (2) kandida ase ki gen dwa parèt. De (2) kandida sa yo, se yo ki te jwenn pi plis vòt nan premye eleksyon an, apre, tout lòt yo fin retire kò yo.

**Nimewo 134-1:** Yo nonmen prezidan an nan eleksyon chak senk (5) an. Tan sèvis Prezidan an kòmanse 7 fevriye apre dat eleksyon an. Li fini tou, 7 fevriye apre dat eleksyon an.

**Nimewo 134-2:** Eleksyon pou prezidan, fèt dènye dimanch mwa novanm, senkyèm ane tan sèvis prezidan an.

**Nimewo 134-3:** Prezidan an pa janm gen dwa double tou suit. Anvan pou I ta jwenn yon dezyèm tan sèvis kòm prezidan, fòk senk (5) ane pase pou pi piti. Ni, pou okenn rezon, li pa gen dwa kandida pou yon twazyèm tan sèvis kòm prezidan.

**Nimewo 135:** Men nan ki kondisyon yon moun gen dwa vin Prezidan Repiblik d Ayiti:

- 1) Fòk li Ayisyen natif natal. Epi, fòk li pa te janm pa Ayisyen ankò.
- 2) Fòk li te deja gen trannsenk (35) ane, jou eleksyon an.
- 3) Fòk li gen tout dwa sivil li ak tout dwa politik li. E, fòk li pa janm jwenn okenn pinisyon grav ou byen okenn pinisyon pou l ta wont, nan men jij ki jije krim yo rele krim dwa komen.
- 4) Fòk li gen omwen yon kay ann Ayiti, e fòk se nan peyi a li abitye rete.
- 5) Fòk li te rete nan peyi a senk (5) ane, youn dèyè lòt, anvan dat eleksyon an.
- 6) Fòk li gen papye ofisyèl li, kòmkwa li an règ ak Leta, si li te reskonsab lajan Leta.

**Nimewo 135-1:** Men ki pawòl Prezidan Republik la pale lè li leve lamen, an prezans asanble nasional la, anvan li rantre nan travay prezidan l:

*"Mwen sèmante, devan Bondye ak devan peyi a, m ap obeyi tou sa ki nan konstitisyon an, ak tou sa ki nan lwa repiblik d Ayiti. E, m ap fè tout moun obeyi yo menm jan tou. M ap respekte tout dwa pèp Ayisyen genyen. E, m ap fè tout moun respekte yo menm jan tou. M ap fè tou sa m kapab pou pèp peyi d Ayiti toujou rete yon gran pèp, pou li toujou mèt lakay li, e pou li pa janm pèdi pi piti moso nan tè peyi a."*

## Paragraf 2

### Sa Prezidan Republik la dwe fè

**Nimewo 136:** Prezidan Republik d Ayiti, kidonk Chèf d Eta a, anchaje fè respekte konstitisyon an, yon jan pou tou sa ki nan konstitisyon an fèt vre, e pou regleman Leta kenbe fèrn. Travay li, se kontwole si tout sèvis Leta yo ak administrasyon piblik la mache korèk, pou Leta toujou soutni pwotokòl Leta li.

**Nimewo 137:** Prezidan an chwazi yon Premye Minis nan pati politik ki gen pi fè manm lachanm yo ladan l. Si pa gen okenn pati politik ki gen pi fà manm lachanm yo ladan l, Prezidan Republik la mande prezidan lachanm senatè ak prezidan lachanm depite, sa yo panse, anvan li chwazi Premye Minis li. Tout jan, lachanm gen pou l deklare si li dakò ak Premye Minis sa a.

**Nimewo 137-1:** Prezidan an kase Premye Minis la, lè Premye Minis la vin ba l demisyon gouvènman an.

**Nimewo 138:** Youn nan wòl Prezidan Republik la se fè yon jan pou pèp Ayisyen toujou mèt lakay li, e pou li pa janm pèdi pi piti moso nantè peyi d Ayiti.

**Nimewo 139:** Men lòt bagay ki sou kont li toujou: tout antant, tout kontra, tout regleman ak lòt peyi. Se li ki fè yo. Se li ki siyen yo. Se li ki voye yo bay asanble nasional la, pou asanble nasional la deklare si li dakò ak yo.

**Nimewo 139-1:** Se li ki siyen lèt nominasyon anbasadè ak reprezantan peyi a, a letranje. Se li ki resevwa anbasadè peyi etranje, lè yo vin prezante lèt nominasyon yo. Se li ki bay konsil peyi etranje, pèmisyon fè travay konsil yo, ann Ayiti.

**Nimewo 140:** Se li ki deklare lagè. Se li ki siyen antant pou fe lapè. Men, fòk asanble nasional la deklare li dakò ak sa.

**Nimewo 141:** Se li ki nonmen kèmandan an chèf lame. Se li ki nonmen kòmandan an chèf lapolis. Se li ki nonmen anbasadè ak konsil jeneral. Men, fòk lachanm senatè dakà ak nominasyon sa yo, anvan pou prezidan an fè desizyon l, nan reyinyon konsèy minis yo.

**Nimewo 142:** Se li ki nonmen tout direktè jeneral nan administrasyon piblik la. Se li ki nonmen delege ak adjwen delege pou depatman ak awondisman. Pou nominasyon sa yo, prezidan an fè desizyon l nan reyinyon konsèy minis yo. Se Prezidan Republik la tou ki nonmen manm Konsèy administrasyon sèvis Leta ki endepandan yo. Men, fòk Lachanm, Senatè dakò ak nominasyon sa yo anvan.

**Nimewo 143:** Prezidan Repiblik la pote non chèf lame. Men, se pa janm li menm. pèsonèl ki kòmande lame.

**Nimewo 144:** Prezidan an fè mete so repiblik d Ayiti sou tout lwa yo, pou l sa fè yo parèt, nan dèle ki make nan konstitisyon an. Anvan dèle a bout, li gen dwa fè lachanm konnen li pa dakò ak yon lwa.

**Nimewo 145:** Prezidan an dwe kontwole si yo obeyi tout desizyon lajistis fè, jan sa ekri nan lalwa.

**Nimewo 146:** Prezidan an gen dwa fè yon moun lajistis kondane, gras. Li gen dwa chanje pinisyon yon moun tou, depi jijman an te fini nèt. Men, sa pa vo pou moun gwo tribinal espesyal konstitisyon sa a prevwa, kondane yo.

**Nimewo 147:** Prezidan an pa janm kapab efase fot yon moun, sof pou yon kòz politik, jan sa make nan lalwa.

**Nimewo 148:** Sizanka prezidan an vin twouve li pa kapab fè travay prezidan I, pou dezoutwa jou, se konsèy minis yo, sou direksyon Premye Minis la, ki va gen pouvwa dirije peyi a, ann atandan.

**Nimewo 149:** Sizanka plas Prezidan Repiblik la vin vid, pou nenpòt ki rezon, se prezidan tribinal kasasyon an ki monte prezidan pwovizwa repiblik la. Si plas prezidan tribinal kasasyon an te vid, se visprezidan tribinal kasasyon an ki monte. Si plas visprezidan an te vid, se jij ki pi ansyen kòm jij tribinal kasasyon an, ki monte. E, se konsa jij tribinal kasasyon yo ta monte, youn dèyè lòt. Asanble Nasyonal la enstale prezidan pwovizwa a nan plas li, apre Premye Minis la konvoke yon reyinyon asanble nasyonal la, jan lalwa di sa dwe fèt.

Jan sa ekri nan konstitisyon an ak nan lwa elektoral la, vòt pou elekson nouvo prezidan, ki va gen yon nouvo tan sèvis senk (5) ane a, dwe fèt karannsenk (45) jou, pou pi ta, apre plas prezidan an vin vid.

**Nimewo 149-1:** Prezidan pwovizwa a, pa janm gen dwa kandida nan elekson nouvo prezidan ki gen pou l fèt la.

**Nimewo 150:** Prezidan Repiblik la pa gen lòt pouvwa pase pouvwa konstitisyon anbali.

**Nimewo 151:** Chak ane, nan kòmansman premye peryòd travay lachanm, Prezidan Repiblik la esplike jan sitiyasyon peyi a ye, nan yon diskou li fè pou lachanm. Pa fèt pou gen okenn diskisyon lachanm, apre diskou sa a.

**Nimewo 152:** Apre Prezidan Repiblik la fin leve lamen kòm prezidan, li gen dwa touche chak mwa, nan kès Leta, pou travay li.

**Nimewo 153:** Kay ofisyèl, kote Prezidan Repiblik la fèt pou li rete a, se palè nasyonal la, nan kapital la, sòf si yon ka sikorans ta fè yo vin tabli gouvènman peyi a yon lòt kote.

**Nimewo 154:** Se Prezidan Repiblik la ki dirije reyinyon konsèy minis yo.

### **Paragraf 3** **Sa gouvènman an ye**

**Nimewo 155:** Gouvènman an fòme ak Premye Minis, minis, ak sekretè d Eta.

Se Premye Minis la ki chèf gouvènman an.

**Nimewo 156:** Tout keksyon ki gade politik peyi a, sou reskonsab gouvènman an.

Gouvènman an gen kont pou l rann lachanm, jan sa make nan konstitisyon an.

**Nimewo 157:** Men nan ki kondisyon yo gen dwa nonmen yon moun Premye Minis:

1) Fòk li Ayisyen natif natal. Epi, fòk li pa te janm pa Ayisyen ankò.

2) Fòk li deja gen trant (30) ane.

3) Fòk li gen tout dwa sivil li ak tout dwa politik li. E, fòk li pa janm jwenn okenn pinisyon grav ou byen okenn pinisyon pou l ta wont, nan men jij ki jije krim yo rele krim dwa komen.

4) Fòk li gen omwen yon kay ann Ayiti, ou byen fòk li gen yon travay nan peyi a

5) Fòk lite rete omwen senk (5) ane youn dèyè lòt, nan peyi a.

6) Fòk li gen papye ofisyèl li, kòmkwa li an règ ak Leta, si lite reskonsab lajan Leta.

#### **Paragraf 4 Sa Premye Minis la gen dwa fè**

**Nimewo 158:** Se ansanm ak prezidan an Premye Minis la chwazi manm kabinè minis li. Apre sa, li dwe parèt devan lachanm pou li mande si lachanm fè l konfyans sou jan li di li pral mennen bak Leta a. Vòt la fèt an piblik. Pou vòt la bon, fòk pi fò manm ni lachanm senatè, ni lachanm depite, vote menm jan.

Si, dapre vòt la, lachanm senatè ou byen lachanm depite, pa fè Premye Minis la konfyans, yo dwe rekòmanse demach yo.

**Nimewo 159:** Premye Minis la anchaje fè aplike lwa yo. Si prezidan an pa la, ou byen si li vin twouve li pa kapab fè travay prezidan l, pou dezoutwajou, se Premye Minis la ki dirige reyinyon konsèy minis yo. Prezidan an gen dwa mande l sa tou. Premye Minis la gen dwa pase lòd. Men, depi se lwa, desizyon ak dekrè, li pa janm kapab sispann suiv yo, ni li pa kapab esplike ki sans yo genyen. Ni li pa gen dwa pa obeyi yo.

**Nimewo 159-1:** Premye Minis la reskonsab defann peyi a, ansanm ak Prezidan Repiblik la.

**Nimewo 160:** Premye Minis la nonmen anplwaye Leta yo li menm, ou byen li fè nonmen yo. Menm jan tou, li revoke yo li menm, ou byen li fè revoke yo. Men, tou sa dwe fèt jan sa make nan konstitisyon an ak nan lwa ki gen regleman pou tout anplwaye Leta.

**Nimewo 161:** Ni Premye Minis la, ni minis yo, gen dwa parèt lachanm pou yo pale an favè pwojè-lwa Prezidan Repiblik la ta renmen fè pase kòm lwa ou byen an favè chanjman prezidan an ta vle yo fè nan yon pwojè-lwa. Yo dwe vin lachanm toujou, lè senatè yo ou byen depite yo gen keksyon pou yo.

**Nimewo 162:** Minis yo fèt pou yo siyen tout desizyon Premye Minis la fè, depi se pou depatman pa yo. Premye Minis la gen dwa anchaje yon depatman tou.

**Nimewo 163:** Ni Premye Minis la, ni tout lòt minis yo reskonsab desizyon Prezidan Repiblik la fè, depi yo siyen yo ansanm avè l. Epi tou, yo dwe kontwole si moun obeyi lwa ki regade depatman pa yo.

**Nimewo 164:** Plas Premye Minis avèk plas manm gouvènman pa ale ak okenn plas manm lachanm. Lè konsa, oubyen yon moun chwazi pou li rete manm lachanm, oubyen li chwazi pou li minis.

**Nimewo 165:** Sizanka Premye Minis la bay demisyon l, gouvènman an rete la, pou l regle detay tou lè jou yo, jistan yo nonmen yon lòt Premye Minis.

#### **Paragraf 5 Minis ak sekretè d Eta**

**Nimewo 166:** Se Prezidan Repiblik la ki dirige reyinyon Konsèy Minis yo. Pi piti valè minis ki dwe genyen, se dis (10). Premye Minis la gen dwa bay yon minis yon adjwen, yo rele sekretè d Eta.

**Nimewo 167:** Lalwa fikse konbyen ministè ou byen depatman minis ki genyen

**Nimewo 168:** Plas minis pa ale ak okenn lòt plas Leta, an wetan plas pwofesè inivèsite.

**Nimewo 169:** Minis yo reskonsab tout desizyon yo siyen ansanm ak Premye Minis la. Fè obeyi lwa yo, sou reskonsab tout minis yo ansanm.

**Nimewo 169-1:** Prezidan Repiblik la ou byen Premye Minis la te mèt pase yon minis nenpòt lòd, kit se ak bouch yo, kit se sou papye, minis la toujou reskonsab tou sa li fè, nan travay minis li.

**Nimewo 170:** Ni Premye Minis la, ni minis yo, ni sekretè d Eta yo, gen dwa touche chak mwa nan lajan Leta pou travay yo, jan sa make nan lwa sou bidjè Leta a.

**Nimewo 171:** Premye Minis la bay minis yo dwa nonmen sèten gwoup anplwaye Leta, jan sa make nan lwa ki gen regleman pou tout anplwaye Leta.

**Nimewo 172:** Sizanka pi fò manm lachanm senatè ou byen lachanm depite vote pou blame yon minis nan mande I keksyon sou jan li fè travay minis li, gouvènman an sètoblige revoke minis la.

## **Chapit 4**

### **Gwoup moun ki gen pouvwa jij nan peyi a**

**Nimewo 173:** Men nan ki tribinal, gwoup moun ki gen pouvwa jij, nan peyi a, gen dwa jije: tribinal pou dènye jijman kidonk tribinal kasasyon, tribinal pou dezyèm jijman, tribinal pou premye jijman, tribinal depè, tribinal espesyal. Se lalwa ki deside ni konbyen tribinal ki genyen, ni ki jij ki ladan, ni ki jan yo òganize yo, ni ki jan yo mache, ni ki wòl yo genyen kote yo mete yo.

**Nimewo 173-1:** Depi gen yon kòz sou dwa sivil, kidonk dwa tout moun ki nan peyi a genyen, se sèl nan tribinal pou sa regle.

**Nimewo 173-2:** Se lalwa sèlman ki gen dwa mete tribinal ou byen kote pou yo jije yon kòz. Yo pa janm gen dwa mete okenn tribinal espre pou de krim estwodinè, yo ta mèt rele yo nenpòt jan.

**Nimewo 174:** Se pou diz (10) an yo nonmen jij tribinal kasasyon ak jij tribinal pou dezyèm jijman. Se pou sèt (7) an, yo nonmen jij tribinal pou premye jijman. Tan sèvis jij kòmanse le jou yo leve lamen pou travay jij yo.

**Nimewo 175:** Se Prezidan Repiblik la ki nonmen jij tribinal kasasyon yo, sou yon lis twa (3) non lachanm senatè prezante I pou chak plas jij. Jij tribinal pou dezyèm jijman yo, ak jij tribinal pou premye jijman yo, se sou yon lis asanble departman an prezante prezidan an li nonmen yo, pou tribinal nan departman an. Jij depè, se sou yon lis asanble minisipal yo prepare, prezidan an nonmen yo.

**Nimewo 176:** Lalwa regle nan ki kondisyon yon moun gen dwa vin jij nan nenpòt tribinal. Yo louvri yon lekòl pou aprann sèvi jij nan tribinal.

**Nimewo 177:** Ni jij tribinal kasasyon, ni jij tribinal pou dezyèm jijman, ni jij tribinal pou premye jijman, la pou tout tan sèvis yo. Sèl lè yo kab revoke yo, se sizanka yon tribinal ta fin jije yo pou yon kòz, nan pye travay yo, ou byen si yo akize yo devan lajistis, kòmkwa yo fè yon krim ou byen yon fòt. Yo pa kab bay yon jij okenn lòt pòs, li mèt se yon pwomosyon, san jij la pa dakò pou sa. Yo pa gen dwa manyen jij, pandan tan sèvis yo, sòf si bon jan papye doktè deklare, sante yo pap pèmèt yo fè travay jij yo poutèt kò a pa bon ou byen paske tèt la pa bon.

**Nimewo 178:** Jij tribinal kasasyon pa fèt pou jije nannan kòz yo. Men, menm moun yo kapab prezante menm kòz la devan tribinal kasasyon, pou yon dezyèm jijman, depi kòz sa a pa t pase devan manm jiri. Nan ka sa a, li mèt te yon kòz ki pa jije devan tribinal dwa komen, tribinal kasasyon oblige asepte fè jijman an, san li pa mande yon lòt tribinal fè I. Lè sa a, tout manm tribinal kasasyon mete ansanm pou yo jije nannan kòz la.

**Nimewo 178-1:** Gen de kòz kote yo mande kase yon jijman pwovizwa, ou byen yon jijman jij denstriksyon, ou byen yon desizyon tribunal pou dezyèm jijman te fè sou jijman sa yo ou byen sou dènye jijman tribunal depè osinon sou desizyon yon tribunal espesyal. Lè sa a, tribunal kasasyon oblige fè desizyon I, li menm, san li pa mande yon lòt tribunal jije kòz la.

**Nimewo 179:** An wetan plas pwofesè, plas jij pa ale ak okenn lòt plas kote yo touche pou sa.

**Nimewo 180:** Tout moun gen dwa vin asiste jijman yon kòz nan tribunal. Men, tribunal la gen dwa pa fè jijman an piblik pou evite dezòd ki ta nui tout moun, ou byen lè yap jije de kòz ki gen de koze sal tout moun pa bezwen tande.

**Nimewo 180-1:** Yo pa kapab defann piblik la vin asiste jijman yon kòz politik ou byen yon kòz moun k ap fè travay journalis li.

**Nimewo 181:** Depi se yon desizyon tribunal ou byen yon jijman, se an piblik yo dwe rann li, ak tout rezon desizyon an osinon jijman an.

**Nimewo 181-1:** Se onon republik d Ayiti yo dwe rann tout desizyon tribunal ou byen tout jijman. Se onon republik d Ayiti tou, yo dwe aplike yo. Tout konmisè gouvènman ak tout moun Leta bay dwa fè fòs pou yo aplike lalwa, resevwa desizyon sa yo ak jijman sa yo, ansanm ak lòd pou yo aplike yo. Desizyon notè yo fè, pou yo oblige yon moun peye dét li, dwe fèt menm jan tou.

**Nimewo 182:** Si de (2) tribunal pa antann yo sou kilès nan yo, ki dwe jije yon kòz, se tribunal kasasyon ki va deside sa, selon sa ki ekri nan lalwa.

**Nimewo 182-1:** Tribunal kasasyon gen dwa jije tout desizyon tribunal militè yo fè, ni sou sa ki te pase, ni sou jan jijman an te fèt.

**Nimewo 183:** Lè pa gen antant sou lwa ki pa ta annakò ak konstitisyon an, tout manm tribunal kasasyon an mete ansanm pou yo jije kòz la, depi yo pote kòz la devan tribunal kasasyon an.

**Nimewo 183-1:** Lè lachanm fin esplike sans yon lwa, yon jan pou tout moun konnen se sa oubyen se pa sa, pa dwe gen diskisyon sou sans lwa sa a ankò. Men, yo pa gen dwa sèvi ak lwa sa a, pou yo kraze dwa, moun te deja genyen anvan lwa a.

**Nimewo 183-2:** Tribunal pa gen dwa aplike desizyon ak regleman administrasyon Leta, ki pa ta soti dakò ak lalwa.

**Nimewo 184:** Se lalwa ki deside ki kòz yon tribunal gen dwa jije, kit se gwo tribunal, kit se ti tribunal. Se lalwa tou ki deside ki fason pou yo prezante yon kòz devan yon tribunal.

**Nimewo 184-1:** Lalwa prevwa tou, ki pinisyon yo dwe bay jij ak konmisè gouvènman ki merite pinisyon. Men, lè se jij tribunal kasasyon ki fè krim, nan pye travay yo, se gwo tribunal espesyal la ki jije yo.

## Chapit 5

### Gwo tribunal espesyal

**Nimewo 185:** Lachanm senatè gen dwa tounen gwo tribunal espesyal. Se prezidan lachanm senatè ki dirije reyinyon gwo tribunal espesyal sa a. Lè sa a, prezidan tribunal kasasyon an, vin ede I, kòm vis-prezidan gwo tribunal espesyal la. Vis-prezidan tribunal kasasyon an, tounen sekretè gwo tribunal espesyal la. Men, sizanka gen jij tribunal kasasyon oubyen konmisè gouvènman nan tribunal kasasyon an, ki twouye mele nan koze a, prezidan lachanm senatè a, va mande de (2) senatè vin ede I nan travay li. Moun yo akize a, va gen dwa chwazi youn nan de (2) senatè sa yo. Men, senatè sa yo, pap gen dwa vote.

**Nimewo 186:** Men ki moun yo gen dwa jije devan gwo tribunal espesyal la, apre vin gen de (2) depite sou chak twa (3) manm lachanm depite ki mande jijman pou moun sa yo:

1) Prezidan Republik la, sizanka li fè krim trayi peyi li, ou byen nenpòt lòt krim, ou byen nenpòt lòt fot grav, nan pye travay li.

2) Premye Minis, minis, sekretè d Eta, ki fè krim trayi peyi yo.

Menm moun sa yo toujou, depi yo fè krim volè lajan Leta, kraze zo, oubyen pou nenpòt lòt krim osinon nenpòt lòt fot grav yo fè, nan pye travay yo.

3) Manm konsèy elektoral ki la nèt la, manm tribinal ki kontwole tout lajan Leta e ki regle tout kòz anplwaye Leta, lè moun sa yo fè yon krim ou byen yon fot ki grav, nan pye travay yo.

4) Jij tribinal kasasyon ak kommisè gouvènman nan tribinal kasasyon an, lè yo fè yon krim nan pye travay yo.

5) Moun Leta nonmen an, pou li pwoteje dwa tout sitwayen.

**Nimewo 187:** Anvan yon reyinyon gwo tribinal espesyal la kòmanse, chak manm tribinal sa a dwe leve lamen pou yo deklare:

*"Mwen sèmante, devan Bondye ak devan peyi a, se ak tout konsyans mwen, ak tout konviksyon mwen, m ap jije kòz sa a, an moun debyen, an moun ki lib, ki pa nan moun pa, ni nan fè pa."*

**Nimewo 188:** Gwo tribinal espesyal la chwazi yon komite an pami manm tribinal la. Se nan yon vòt sekrè yo chwazi komite sa a, ki fèt pou li prepare tou sa ki nesesè pou jijman kòz la. Se moun ki gen plis vòt yo ki va manm komite sa a.

**Nimewo 188-1:** Komite pou preparasyon kòz la va prezante gwo tribinal espesyal la yon rapò. Gwo tribinal espesyal la va fè desizyon I sou rapò a, an fòm yon dekrè. Men, fòk sou chak twa (3) manm tribinal la, gen de (2) omwen ki vote an favè dekrè a.

**Nimewo 189:** Pou gwo tribinal espesyal la gen dwa travay, fòk gen de (2) manm omwen ki la, sou chak twa (3) manm.

**Nimewo 189-1:** Men ki pinisyon gwo tribinal espesyal la gen dwa bay ase:

1) Fè moun yo kondane a, pèdi plas li.

2) Fè I pèdi tout avantaj plas sa a te ba li.

3) Defann li travay nan plas Leta pandan senk (5) ane, pou pi piti, ou byen pandan kenz (15) ane, pou pi plis.

**Nimewo 189-2:** Anyen pa anpeche yo fè, moun gwo tribinal espesyal la kondane, pase devan lòt tribinal nòmal yo toujou, selon sa lalwa mande, pou moun yo kondane a sibi lòt pinisyon, oubyen pou regleman reparasyon ki sou kont li.

**Nimewo 190:** Depi yo mete yon kòz devan gwo tribinal espesyal la, tribinal la fèt pou I kontinye travay, jistan li fè desizyon I, san I pa okipe peryòd travay lachanm yo.

## SIZYÈM PATI KONSTITISYON AN SOU: SÈVIS LETA KI ENDEPANDAN YO

### Chapit 1 Konsèy elektoral ki la nèt la

**Nimewo 191:** Konsèy elektoral ki la nèt la anchaje òganize tout afè eleksyon, e li anchaje kontwole tout afè eleksyon nan tout peyi a, jis jou yo bay rezulta vòt la, san li pa sou zòd pèsonn.

**Nimewo 191-1:** Se li ki prepare pwojè-lwa pou eleksyon. Lè fini, li remèt moun ki gen pouvwa dirije peyi a, pwojè-lwa a, pou yo fè tout sa ki nesesè.

**Nimewo 191-2:** Li kontwole si lis non moun ki gen dwa vote yo, toujou an fòm.

**Nimewo 192:** Konsèy elektoral ki la nèt la fòme ak nèf (9) manm, yo chwazi nan yon lis twa (3) non, chak asanble depatman yo prezante.

Moun ki gen dwa dirije peyi a, chwazi twa (3) nan yo.

Tribinal kasasyon chwazi twa (3) nan yo.

Asanble nasyonal la chwazi twa (3) nan yo.

Twa gwoup moun sa yo dwe fè yon jan, pou chak depatman gen moun nan konsèy elektoral ki la nèt la.

**Nimewo 193:** Men nan ki kondisyon yon moun gen dwa vin manm konsèy elektoral ki la nèt la:

1) Fòk li Ayisyen natif natal. Epi, fòk li pa te janm pa Ayisyen ankò.

2) Fòk li deja gen karant (40) ane pou pi piti.

3) Fòk li gen tout dwa sivil li ak tout dwa politik li. E, fòk li pa janm jwenn okenn pinisyon grav ou byen okenn pinisyon pou l ta wont, nan men jij ki jije krim yo rele krim dwa komen.

4) Fòk li gen papye ofisyèl li, kòmkwa li an règ ak Leta, si lite reskonsab lajan Leta.

5) Fòk li te rete omwen twa (3) ane nan peyi a, anvan jou yo nonmen l manm konsèy elektoral ki la nèt la.

**Nimewo 194:** Tan sèvis manm konsèy elektoral ki la nèt la, se nèf (9) ane. Yo pa gen dwa double. Ni yo pa gen dwa manyen yo.

**Nimewo 194-1:** Chak twa (3) ane, yo fèt pou yo chanje twa (3) nan nèf (9) manm konsèy elektoral ki la nèt la, apre tan sèvis yo fini. Yo chwazi prezidan konsèy elektoral ki la nèt la, pami manm konsèy la.

**Nimewo 194-2:** Men pawòl manm konsèy elektoral ki la nèt la pale, lè yo leve lamen, devan tribinal kasasyon an, anvan yo rantre nan travay yo:

*"Mwen sèmante m ap respekte konstitisyon an, ansanm ak sa lwa elektoral la prevwa. Mwen sèmante m ap fè travay mwen an moun debyen, an moun ki pa sou zòd moun, an moun ki pa nan moun pa, an moun ki renmen peyi l."*

**Nimewo 195:** Sizanka yon manm konsèy elektoral ki la nèt la, fè yon fòt ki grav, nan pye travay li, se gwo tribinal espesyal la ki dwe jije l pou sa.

**Nimewo 195-1:** Konsèy elektoral ki la nèt la chita nan kapital la. Men, se tout peyi a ki sou kont li, pou afè eleksyon.

**Nimewo 196:** Plas manm konsèy elektoral ki la nèt la, pa ale ak okenn lòt plas Leta. Pandan tout tan sèvis yo, yo pa gen dwa kandida pou okenn plas Leta ki mande eleksyon. Yo fèt pou yo tann twa (3) ane, apre yo bay demis yon yo, anvan pou yo ta kandida pou yon plas Leta ki mande eleksyon.

**Nimewo 197:** Konsèy elektoral ki la nèt la dwe regle tout diskisyon ki leve, ni nan afè eleksyon, ni nan jan yo aplike lwa eleksyon an, ni nan jan yo pa aplike lwa eleksyon an. Sa pa anpeche yo gen dwa ale devan lòt tribinal ki gen dwa jije yon moun ou byen plizyè moun ki ta koupab, pou yo pini yo.

**Nimewo 198:** Sizanka plas yon manm konsèy elektoral ki la nèt la vin vid, poutèt lanmò, poutèt demisyon, ou byen pou yon lòt rezon, se pou yo ranplase manm sa a, pou rès tan sèvis li. Se gwoup moun ki te chwazi manm ki pa la ankò a, ki dwe ranplase l, jan sa make nan nimewo 192 la.

**Nimewo 199:** Lalwa deside kouman konsèy elektoral ki la nèt la, òganize ak kouman pou li mache.

## Chapit 2

### Tribinal ki kontwole tout lajan Leta e ki regle tout kòz anplwaye Leta

**Nimewo 200:** Tribunal ki kontwole tout lajan Leta e ki regle tout kòz anplwaye Leta, se yon tribunal ki endependan e ki mèt tèt li. L'okipe tout afè lajan Leta ak tout afè administrasyon Leta. Li anchaje kontwole si yo administre resèt ak depans Leta yo, legal. Li dwe kontwole liv kontabilite biznis Leta ak biznis ki pou zòn nan peyi a.

**Nimewo 200-1:** Men ki sa tribunal ki kontwole tout lajan Leta e ki regle tout kòz anplwaye Leta yo gen dwa jije:

Tout kòz ki mele ak Leta, ak zòn peyi a, ak administrasyon piblik, ak anplwaye Leta, ak sèvis Leta, ak moun ki resevwa sèvis nan men Leta.

**Nimewo 200-2:** An wetan tribunal kasasyon, yo pa kapab parèt devan okenn lòt tribunal, pou yo kase yon desizyon tribunal ki kontwole tout lajan Leta e ki regle tout kòz anplwaye Leta.

**Nimewo 200-3:** Tribunal ki kontwole tout lajan Leta e ki regle tout kòz anplwaye Leta, gen de (2) branch:

- 1) Yon branch pou kontwole lajan.
- 2) Yon branch pou pwoblèm administrasyon.

**Nimewo 200-4:** Tribunal ki kontwole tout lajan Leta, e ki regle tout kòz anplwaye Leta, bay konkou l pou yo fè bidjè Leta a. Yo dwe mande l sa l panse, anvan pou yo fè nenpòt lwa sou lajan Leta, anvan pou yo siyen nenpòt kontra, nenpòt regleman, nenpòt papye pou Leta, sou afè lajan ou byen sou komès. Li gen dwa kontwole liv kontabilite tout sèvis Leta yo.

**Nimewo 200-5:** Men nan ki kondisyon yon moun gen dwa vin manm tribunal ki kontwole tout lajan Leta, e ki regle tout kòz anplwaye Leta:

- 1) Fòk li Ayisyen, e fòk li pa te janm pa Ayisyen ankò.
- 2) Fòk li deja gen trannsenk (35) ane.
- 3) Fòk li gen papye ofisyèl li, kòmkwa li an règ ak Leta, si lite reskonsab lajan Leta.
- 4) Fòk li gen yon lisans an dwa ou byen fòk li gen yon diplòm kontab ofisyèl, ou byen yon diplòm inivèsite, ann administrasyon piblik, osinon ann ekonomi, osinon an finans piblik.
- 5) Fòk lite travay pandan senk (5) ane nan yon sèvis Leta ou byen nan yon sèvis prive.
- 6) Fòk li gen tout dwa sivil li ak tout dwa politik li.

**Nimewo 200-6:** Moun ki vle kandida pou plas manm tribunal sa a, fèt pou yo enskri non yo, yo menm, nan biwo lachanm senatè yo. Lachanm senatè yo va chwazi dis (10) manm tribunal sa a. Se dis (10) manm yo ki va chwazi yon prezidan ak yon visprezidan, an pam yo.

**Nimewo 201:** Tan sèvis manm tribunal sa a, se dis (10) ane. Ni yo pa gen dwa manyen yo.

**Nimewo 202:** Men pawòl manm tribunal ki kontwole tout lajan Leta, e ki regle tout kòz anplwaye Leta, pale, lè yo leve lamen devan yon branch tribunal kasasyon an, anvan yo rantre nan travay yo:

*"Mwen sèmante m ap respekte konstitisyon an, ansanm ak lwa peyi a. Mwen sèmante m ap fè travay mwen korèk, san mank, an moun debyen."*

**Nimewo 203:** Sizanka yon manm tribunal ki kontwole tout lajan Leta, e ki regle tout kòz anplwaye Leta, fè de fòt grav, nan pye travay li, se gwo tribunal espesyal la ki dwe jije l pou sa.

**Nimewo 204:** Chak ane, anvan trant jou pase, apre premye peryòd travay lachanm kòmanse, tribunal ki kontwole tout lajan Leta, e ki regle tout kòz anplwaye Leta, dwe fè lachanm jwenn yon rapò sou tout sitiyasyon lajan peyi a, epi sou tout depans ki fèt ak lajan Leta, bay.

**Nimewo 205:** Lalwa deside kouman tribunal sa a òganize, kouman li mache, epi ki wòl ak ki dwa manm li yo genyen.

### **Chapit 3** **Komite pou mete antant**

**Nimewo 206:** Gen yon komite pou mete antant ant gwooup moun ki gen pouvwa dirije peyi a ak gwooup moun ki gen pouvwa fè lwa pou peyi a, lè pa gen antant. Menm jan tou, ant lachanm senatè ak lachanm depite, lè pa gen antant. Men ki moun ki nan komite sa a:

- 1) Prezidan tribunal kasasyon an. Se li ki prezidan komite a.
- 2) Prezidan lachanm senatè. Se li ki vis-prezidan komite a.
- 3) Prezidan lachanm depite. Li manm komite a.
- 4) Prezidan konsèy elektoral ki la nèt la. Li manm komite a.
- 5) Vis-prezidan konsèy elektoral ki la nèt la. Li manm komite a.
- 6) De (2) minis, Prezidan Repiblik la chwazi. Yo manm komite a.

**Nimewo 206-1:** Lalwa deside kouman komite pou mete antant lan mache.

### **Chapit 4** **Biwo pou pwoteje sitwayen**

**Nimewo 207:** Yo mete yon biwo yo rele: Biwo pou pwoteje sitwayen. Biwo sa a la, pou li pwoteje tout moun, kont tout kalite abi yo ta fè yo, nan sèvis Leta yo.

**Nimewo 207-1:** Sitwayen ki alatèt biwo sa a, pote non: moun ki pwoteje sitwayen. Prezidan Repiblik la antann li, ni ak prezidan lachanm senatè, ni ak prezidan lachanm depite, pou yo chwazi l. Tan sèvis li, se sèt (7) ane. Pa gen double.

**Nimewo 207-2:** Li mèt nan nenpòt tribunal, l al defann yon moun ki pote plent nan biwo a, sa toujou fèt gratis.

**Nimewo 207-3:** Yon lwa regle nan ki kondisyon biwo pou pwoteje sitwayen an mache, epi ak ki regleman.

### **Chapit 5** **Inivèsite Akademi Richès ki nan sèvo pèp la**

**Nimewo 208:** Lekòl ki fèt pou moun jwenn degré konesans ki vin apre lekòl segondè dwe lib. Degré konesans siperyè sa a, yojwenn li, nan inivèsite d Eta d Ayiti, nan lekòl siperyè Leta, ou byen nan lekòl siperyè prive, Leta bay pèmisyon louvri. Inivèsite d Eta d Ayiti mèt tèt li.

**Nimewo 209:** Leta fèt pou l bay, ni inivesite d Eta d Ayiti a, ni lekòl siperyè Leta yo, lajan yo bezwen pou yo mache epi pou yo fè bon jan pwogrè. Kote yo mete yo, ak jan pou yo òganize yo, tou sa dwe fèt yon fason pou tout yon zòn mache nan wout pwogrè toutbon.

**Nimewo 210:** Yo dwe ankouraje moun fòme sant pou yo chèche tout mwayen pou lasyans fè pwogrè.

**Nimewo 211:** Anvan pou inivèsite ak lekòl siperyè prive kòmanse mache nan peyi a, fòk yo jwenn pèmisyon pou sa, nan men konsèy inivèsite d Eta a. Men lòt kondisyon toujou:

se Ayisyen ki dwe kontwole pi fò lajan ki nesesè pou inivèsite ak lekòl siperyè prive yo mache. Pi fò pwofesè yo tou, dwe Ayisyen. Pi fò kou yo, dwe fèt nan lang ofisyèl peyi a.

**Nimewo 211-1:** Sa yo montre ni nan inivèsite, ni nan lekòl siperyè prive ni nan lekòl siperyè Leta, dwe soti dakò ak sa peyi a bezwen pou li vanse nan bon wout pwogrè.

**Nimewo 212:** Yon lwa espesyal regle nan ki kondisyon ak ki kote nan peyi a, yo gen dwa mete inivèsite, lekòl siperyè Leta, ak lekòl siperyè prive.

Menm lwa sa a, va deside kouman pou yo mache.

**Nimewo 213:** Yo mete yon Akademi Ayisyen pou li fikse lang kreyòl la e pou li fè l'kapab devlope anfòm, ann òd epi selon prensip lasyans.

**Nimewo 213-1:** Yo kapab mete, lòt akademi toujou.

**Nimewo 214:** Pote non: manm akademi, se yon dekorasyon.

**Nimewo 214-1:** Lalwa deside kouman akademi yo òganize ak kouman pou yo mache.

**Nimewo 215:** Tout bèle bagay ki nan peyi d Ayiti depi tan lontan, tout kote istwa d Ayiti fè n konnen poutèt mèvèy moun lontan nou yo te fè la, tout richès ki soti nan sèvo ak nan lespri pèp Ayisyen, tout bèle batisman tan lontan yo, dwe sèvi pèp Ayisyen temwen, kòmkwa lite toujou yon gran pèp. Tout richès sa yo, se byen peyi a yo ye. Se pou sa, Leta reskonsab pwoteje:

- 1) Tout batisman lontan yo, ak sa ki rete nan yo.
- 2) Tout kote, san moun lontan nou yo te koule, nan goumen ak lènmi nou yo.
- 3) Tout kote yo abitye sèvi selon kwayans Lafrik moun lontan nou yo.
- 4) Tou sa ki kapab fè nou sonje mèvèy yo te konn fè yo.

**Nimewo 216:** Lalwa va detaye ki jan, ak nan ki kondisyon, yo va pwoteje tout richès sa yo.

### **Setyèm Pati Konstitisyon an Sou: lajan Leta**

**Nimewo 217:** Lajan Leta pa fèt pou l ret nan men yon ti ponyen moun ase. Li dwe sou reskonsab tout zòn peyi a. Gen yon ministè ki okipe tout keksyon lajan Leta pi dirèk. Yon konsèy pou tout depatman yo, dwe ede gwooup moun ki gen pouvwa dirije peyi a, prepare lwa ki fikse valè chak zòn peyi a gen pou yo resevwa nan lajan Leta a.

**Nimewo 218:** Se ak yon lwa sèlman, yo gen dwa mete yon enpo pou Leta. Kit nan depatman, kit nan komin, kit nan seksyon kominal, yo pa kapab mete okenn dwa ni okenn kalite enpo, san zòn peyi sa yo pa dakò ak sa.

**Nimewo 219:** Nan peye enpo, nan pwen fè favè. Se lalwa sèlman ki kapab bay dwa pa peye enpo, mete sou enpo, wete sou enpo, disparèt enpo.

**Nimewo 220:** Se yon lwa sèlman ki kab pèmèt yo sèvi ak lajan Leta, ni pou pansyon, ni pou mete anwo salè, ni pou èd, ni pou sibvansyon.

Pansyon Leta yo, va suiv pri lavi tou lè jou, pye pou pye.

**Nimewo 221:** Pèsonn moun pa janm gen dwa touche nan de (2) plas Leta an menm tan, sòf plas pwofesè, epi lè gen yon aranjman espesyal ki fèt.

**Nimewo 222:** Lalwa deside ki demach ki dwe fèt pou prepare bidjè Leta a, e pou aplike l.

**Nimewo 223:** Tribunal ki kontwole tout lajan Leta, e ki regle tout kòz anplwaye Leta, ansanm ak biwo bidjè Leta a, anchaje kontwole kouman yo aplike lwa sou bidjè Leta a ak sou kontabilite Leta a.

**Nimewo 224:** Se bank santral la, ansanm ak ministè ekonomi ak ministè finans ki regle kouman pou yo sèvi ak lajan peyi a.

**Nimewo 225:** Bank santral la, se yon sèvis Leta ki mèt tèt li. Li gen tout dwa yon granmoun genyen, devan lalwa. Li mèt tèt li toujou, sou koze lajan. Lalwa deside ki wòl ak ki dwa bank santral la genyen.

**Nimewo 226:** Se sèl bank santral la ki gen dwa fè lajan ki vo pou tout peyi d Ayiti. Lalwa regle sa lajan an vo, sa ki make anwo biye lajan ak pyès monnen yo, ki desen ak ki nimewo ki dwe anwo yo, ki pwa yo dwe genyen.

**Nimewo 227:** Bidjè chak ministè divize an chapit ak an paragraf. Yo dwe vote chak nimewo bidjè yo, youn dèyè lòt.

**Nimewo 227-1:** Bidjè Leta a divize an douz pòsyon, youn pou chak mwa nan ane a, sof mwa desamn nan, ki gen de (2) pòsyon, poutèt mwa salè an plis, yo rele boni an, yo dwe peye tout fonksyonè ak tout anplwaye Leta. Se konsa, valè lajan chak ministè dwe pran chak mwa, sou bidjè a, pa dwe depase pòsyon yo prevwa pou chak mwa.

**Nimewo 227-2:** Se minis finans lan ki okipe kontabilite tout resèt ak tout depans Leta, selon sistèm kontabilite lalwa mete pou sa.

**Nimewo 227-3:** Chak ane, anvan kenz (15) jou pase, apre premye peryòd travay lachanm kòmanse, minis finans lan dwe voye liv kontabilite ak bidjè sa yo, nan lachanm, ansanm ak rapò tribunal ki kontwole tout lajan Leta, e ki regle tout kòz anplwaye Leta. Menm jan tou pou tout lòt liv kontabilite Leta yo, ak pou bilan aktivite bank santral la dwe fè chak ane.

**Nimewo 227-4:** Pou tout afè lajan ak administrasyon Leta, se premye oktòb ki premye jou ane fiskal la, e se 30 sektanm ki dènye jou a.

**Nimewo 228:** Chak ane, lachanm mete yon pwen final:

- 1) Nan total resèt ak depans Leta, pou ane ki fèk pase a, ak lòt ane anvan yo.
- 2) Nan tout bidjè Leta a. Bidjè sa a dwe bay ki pòsyon lajan chak ministè ap jwenn pou ane a, ak ki sa li fè lide fè avèk lajan sa a. Se konsa li fèmen ane fiskal la.

**Nimewo 228-1:** Men, lè y ap vote bidjè Leta a, yo pa kapab mande okenn chanjman, ni yo pa kapab fè okenn chanjman nan bidjè a, san yo pa prevwa kote y ap jwenn lajan an.

**Nimewo 228-2:** Yo pa kapab ni mete, ni wete sou lajan anplwaye Leta yo, san yo pa chanje lwa ki regle salè anplwaye sa yo touche.

**Nimewo 229:** Lachanm gen dwa pa travay toutotan li pa jwenn dokiman yo pale de yo, pi wo a (\*7). Si dokiman yo, ou byen pyès ki ale avèk yo, pa sifi pou lachanm kapab konprann liv kontabilite yo korèk, osinon pou li kapab kontwole yo byen, lachanm ap refize bay minis yo papye ofisyèl yo, kòmkwa yo an règ ak Leta pou lajan Leta ki te sou kont yo.

**Nimewo 230:** Lalwa deside kouman yo dwe fè kalkil ak regleman kontabilite tout administrasyon Leta a. Menm jan tou pou moun ki reskonsab lajan Leta.

**Nimewo 231:** Sizanka lachanm pa te gen tan fèmen ane fiskal la pou yon departman minis ou byen pou plizyè ministè, pou nenpòt rezon, se ak bidjè ki pankò fèmen an y a sèvi, jistan yo vote yon nouvo bidjè.

**Nimewo 231-1:** Sizanka se gouvènman an ki lakòz yo pa vote bidjè Leta a, Prezidan Repiblik la mande yon reyinyon espesyal tousuit, pou lachanm vote bidjè a sèlman.

**Nimewo 232:** Sèvis ak biznis Leta ki mèt tèt yo, sèvi ak de bidjè espesyal. Gouvènman an dwe di mo pa l, sou jan yo peye anplwaye sèvis sa yo, epi sou jan yo touche. Se menm bagay tou pou lòt gwoup ki resevwa lajan nan men Leta, kit se pou tout aktivite yo, kit se pou yon pati ladan yo.

**Nimewo 233:** Nan kòmansman chak peryòd travay lachanm, yo fòme yon komite lachanm ak kenz (15) manm, nèf (9) depite, sis (6) senatè. Se nan yon vòt sekrè yo chwazi komite lachanm sa a. Travay komite sa a, se ret veyatif pou depans Leta, toujou fèt korèk. Se komite sa a ki dwe fè yon rapò sou travay minis yo, yon jan pou lachanm kapab bay minis sa yo papye ofisyèl yo, kòmkwa yo an règ ak Leta. Komite sa a gen dwa mande espesyalis konkou, pou yo ede yo kontwole depans Leta.

## UITYÈM PATI KONSTITISYON AN

### Sou: Administrasyon Biblik la

**Nimewo 234:** Administrasyon biblik peyi d Ayiti, se yon zouti ki pèmèt Leta kenbe wòl li korèk. Se gras a li Leta kapab rive fè travay li nan avantaj pèp Ayisyen. Pou zouti sa a kapab itil peyi a vre, fòk yo sèvi avè I pwòp, e fòk li anfòm.

**Nimewo 235:** Fonksyonè Leta ak anplwaye Leta o sèvis Leta sèlman. Yo fèt pou yo respekte dènye regleman, nan lwa sou administrasyon biblik la. Iwa sa a moutre yo kouman pou yo kondui tèt yo, kòm bon sèvitè Leta.

**Nimewo 236:** Se lalwa ki regle ki jan chapant administrasyon biblik la kanpe, e ki jan administrasyon an dwe mache.

**Nimewo 236-1:** Regleman lalwa mete pou administrasyon biblik la, chita sou sa moun kab fè, sou sa moun deja fè, e sou jan moun kondui tèt yo.

Lalwa fè yon jan pou plas anplwaye asire.

**Nimewo 236-2:** Administrasyon biblik, se yon metye anfòm yon chemen k ap monte. Se egzamen, ansam ak lòt regleman ki pèmèt moun antre ladan I. Regleman sa yo make nan konstitisyon an ou byen nan lalwa. Yo pa gen dwa revoke okenn fonksyonè ki vin fonksyonè nan kondisyon sa yo, san se pa pou rezon lalwa make klè. Tout jan, se tribunal ki regle kòz tout anplwaye Leta ki gen dwa deklare yo revoke yon fonksyonè.

**Nimewo 237:** Fonksyonè Leta, pa la pou yon sèl grenn sèvis Leta, men pou tout administrasyon biblik la. Se administrasyon biblik la ki voye yo nan tèl sèvis Leta ou byen nan tèl lòt sèvis Leta.

**Nimewo 238:** Lalwa fè n konnen kilès, nan fonksyonè Leta yo, ki sètoblje deklare ki valè byen yo genyen. Yo dwe fè deklarasyon sa a devan grefye tribunal civil la, anvan trant (30) jou pase, depi yo rantre nan travay yo. Konmisè gouvènman an va fè mwayen posib li, pou li kontwole si deklarasyon sa a, se laverite.

**Nimewo 239:** Fonksyonè ak anplwaye Leta gen dwa mete asosiyasyon sou pye pou yo defann dwa yo. Lalwa prevwa nan ki kondisyon.

**Nimewo 240:** Plas politik ak pòs politik pa pèmèt moun antre nan chemen administrasyon biblik la. Plas politik, se plas tankou: plas minis, sekretè d Eta, konmisè gouvènman, delege ak adjwen delege depatman, anbasadè, sekretè prive Prezidan Repiblik la, manm kabinè yon minis, direktè jeneral yon depatman minis, direktè jeneral sèvis Leta ki mèt tèt yo, manm konsèy administrasyon sèvis sa yo.

**Nimewo 241:** Lalwa pini moun ki nan fè koken ak sèvis kontribisyon ak moun ki fè kòb nan move konminezon sou do Leta. Fonksyonè Leta ki okouran zak sa yo sètoblje avèti otorite ki la pou sa yo.

**Nimewo 242:** Yo gen dwa chèche jwenn tout kalite prèv kont moun ki fè kòb nan move konminezon sou do Leta. Youn nan prèv yo, se lè yon fonksyonè, vin chaje ak byen, li pa ta fouti vin genyen ak tout lajan, plas Leta a ta ba l dwa touche, depi li rantre nan travay la.

**Nimewo 243:** Se apre yon dèle ven (20) ane, tribunal pa gen dwa jije yon fonksyonè ki ta fè zak yo pale de yo a, nan nimewo 242 a. Dèle sa a kòmanse lemoman fonksyonè a pèdi plas li, ou byen lemoman rezon ki fè yo pa te kapab jije l nan tribunal, pa vo ankò.

**Nimewo 244:** Fòk Leta degaje I pou pa gen yon twò gwo diferans nan lajan chak moun touche, nan travay Leta.

## NEVYÈM PATI KONSTITISYON AN

### Chapit 1 Ekonomi peyi a. Travay tè, nan peyi a.

**Nimewo 245:** Moun gen dwa fè lajan lib, nan peyi a, toutotan jan yo fè lajan an pa nui enterè pi fò moun k ap viv nan peyi a.

Leta pwoteje biznis prive. Li fè yon jan pou mòd biznis sa a ogmante richès tout peyi a, dekwa pou pi plis moun jwenn avantaj pa yo, nan richès sa a.

**Nimewo 246:** Leta ankouraje koperativ nan tout peyi a, ni lavil, ni andeyò. Koperativ sa yo pèmèt pwodui danre, nan peyi a, epi fè danre sa yo bay bon rannman. Leta ankouraje moun ki vle fè biznis, yon jan pou vin gen pi plis lajan nan peyi a, konsa peyi a va pi fasil kontinye vanse nan bon wout pwogrè.

**Nimewo 247:** Se travay tè ki premye richès peyi d Ayiti. Se sa ki va pèmèt tout moun nan peyi a, viv alèz. Se sa ki va pèmèt peyi a mache nan bon wout pwogrè.

**Nimewo 248:** Yo mete yon biwo espesyal pou korije tout dezòd ki tap fèt nan peyi a nan koze pran tè, achte tè, separe tè, sou do abitan ki travay Non biwo a, se: Biwo pwogram Leta pou regle pwoblèm tè. Se abitan k ap travay tè, ki fèt pou yo jwi fwi travay yo, an premye. Tout mwayen ki va pèmèt okipe tè peyi a, yon jan pou li bay tout bon rannman li kapab bay, e pou li vin an fòm, nan avantaj abitan yo, Biwo pwogram Leta a dwe pran yo ann etid.

**Nimewo 248-1:** Lalwa regle ki pi gwo valè tè moun ou byen gwoup moun k ap travay tè gen dwa genyen. Lalwa regle tou, ki pi piti valè tè, moun ou byen gwoup moun k ap travay tè, fèt pou yo genyen.

**Nimewo 249:** Leta fèt pou li mete tou sa ki nesesè an plas, pou tè peyi a rive bay tout bon rannman li kapab bay, epi pou danre peyi a pwodui, rive vann anndan tout peyi a. Nan chak seksyon kominal, y ap mete gwoup teknisyen pou ede abitan nan komin nan jwenn tout konkou yo bezwen ni pou yo travay tè a, ni pou yo twouve lajan pou sa.

**Nimewo 250:** Yo pa kapab bay ni Leta ni okenn zòn peyi a, yon monopòl (\*8), sòf si se ta sèl jan, pou pi fò moun nan peyi a, rive jwenn avantaj pa yo ladan vre. Yo pa jamn gen dwa bay yon sèl grenn moun yon monopòl.

**Nimewo 251:** Lè tè peyi d Ayiti kapab fè danre ak pwodui ki sòti nan danre yo, sifizaman dekwa pou tout moun nan peyi a jwenn pa yo, yo pa gen dwa kite danre sa yo soti a letranje pou yo rantre nan peyi a, sof si ta gen gwo ka sikontans.

**Nimewo 252:** Leta gen dwa pran yon biznis sou kont li, pou li fè I mache, depi biznis sa a okipe bagay ki nesesè pou pi fò moun nan peyi a kab viv. Sa gen dwa fèt, lè biznis sa yo pa kapab kontinye mache ou byen si yo ta oblige fèmen. Lè sa a yo va mete tout biznis ki vin sou kont Leta yo, ansam, pou Leta kontwole jan yo mache.

### Chapit 2 Tè peyi a ak tou sa ki alantou tè a

**Nimewo 253:** Tè peyi a ak tou sa ki alantou tè a, se la tout moun viv, nòmal. Yo pa jamn gen dwa fè okenn zak ki ta detwi tè a ak tou sa ki alantou tè a.

**Nimewo 254:** Leta fèt pou li okipe ranje tout bèl kote nan peyi a, pou yo pi an fòm. Li dwe fè yon jan pou tout moun kapab rive la fasil.

**Nimewo 255:** Leta fèt pou li pwoteje tout forè ki rete nan peyi a. Li dwe fè plante pyebwa pou pyebwa kouvri peyi a nèt. Se pou sa, li va ankouraje moun sèvi ak tout bon teknik ki pa detwi tè a, ni ki pa sal tou sa ki alantou tè a, tankou teknik ki sèvi ak solèy, ou byen ak van, ou byen ak lòt mwayen, pou bay kouran elektrik.

**Nimewo 256:** Leta fèt pou li fè tout moun jwenn bon fòmasyon pou yo rive pwoteje tè peyi a, ak tou sa ki alantou tè a. Se pou sa, Leta va mete pak kote yo okipe tout kalite bêt, ak teren kote yo fè tout kalite plant ak pyebwa pouse, nan divès zòn peyi a.

**Nimewo 257:** Lalwa regle nan ki kondisyon yo dwe pwoteje tout kalite bêt ki nan peyi a, ak tout kalite plant ak pyebwa ki pouse nan peyi a, pou yo pa disparèt. Lalwa gen dwa pini moun ki pa respekte regleman sa yo.

**Nimewo 258:** Pèsonn moun pa gen dwa fè peyi d Ayiti tounen yon poubèl, pou peyi etranje ta vin jete fatra ak nenpòt vye rèsrestan ki sòti lakay yo.

### **Dizyèm Pati Konstitisyon an Sou Paran ak Pitit**

**Nimewo 259:** Nan yon peyi, se sou paran ak pitit tout sosyete a chita. Se pou sa, Leta dwe pwoteje yo.

**Nimewo 260:** Leta fèt pou li pwoteje tout paran ak pitit, nan peyi a, menm jan, kit paran yo marye, kit yo pa marye. Tout manman ki fè pitit, fèt pou Leta ba yo konkou. Menm jan tou, pou timoun piti ak pou vye granmoun.

**Nimewo 261:** Leta fèt pou li pwoteje tout timoun. Se dwa tout timoun pou manman yo ak papa yo renmen yo, pou yo ancheri yo, pou yo chèche konprann yo, pou yo ba yo bon okipasyon ak bon elevasyon.

**Nimewo 262:** Yo dwe prepare yon liv regleman pou paran ak pitit, yon jan pou yo pwoteje dwa tout paran ak pitit genyen, yon jan pou yo fè respekte dwa sa yo, yon jan pou yo regle kouman yo va gen dwa chèche konnen kilès ki papa yon timoun. Nan dènye ti zòn peyi a, dwe gen tribinal ak biwo Leta ki anchaje pwoteje dwa sa yo. Tout moun gen dwa adrese yo gratis.

### **Onzyèm Pati Konstitisyon an Sou: Lame ak Lapolis**

**Nimewo 263:** Gen de (2) gwoup separe ki gen dwa gen zam: se lame ak lapolis.

**Nimewo 263-1:** Pa kapab gen okenn lòt gwoup ki gen dwa pote zam, nan tout peyi a.

**Nimewo 263-2:** Lè yon moun anwole nan lame ou byen nan lapolis, li leve lamen pou li sèmante, li pap janm trayi ni konstitisyon an, ni drapo a, e l ap toujou respekte yo.

### **Chapit I Lame**

**Nimewo 264:** Gen plizyè branch nan lame d Ayiti: lame ki pou a tè, lame ki pou lanmè, lame ki pou anlè, ak sèvis teknisyen lame.

Lame d Ayiti la, pou peyi a kapab viv anpè, e pou okenn lòt peyi pa rantre pran pi piti moso nan peyi d Ayiti.

**Nimewo 264-1:** Moun ki kòmande lame d Ayiti toutbon, se yon ofisye ki gen grad jeneral, yo rele: kònmandan an chèf lame d Ayiti.

**Nimewo 264-2:** Se pamí ofisye ki an sèvis aktif, e ki gen grad jeneral, konstitisyon an mande pou yo chwazi kònmandan an chèf lame a.

**Nimewo 264-3:** Tan sèvis li dire twa (3) zan. Li gen dwa double.

**Nimewo 265:** Manm lame yo, pa nan fè politik ni yo pa gen dwa rantre nan yon gwoup politik ou byen nan yon pati politik. Yo pa janm dwe pran pou okenn nan yo.

**Nimewo 265-1:** Manm lame vote selon konstitisyon an.

**Nimewo 266:** Men wòl lame:

- 1) Defann peyi a, si gen lagè.
- 2) Pwoteje peyi a kont danje ki sot a letranje.
- 3) Siveye tout fwontyè peyi a ni a tè, ni sou lanmè, ni anlè.
- 4) Bay lapolis konkou, sizanka lapolis pa kapab fè travay li, depi gouvènman an gen bon jan rezon pou sa.
- 5) Ede moun ki nan peyi a, nan tan malè ak devas.
- 6) Men nan ki travay ki pa pwòp travay lame, yo kab mete I toujou: ede peyi a mache nan bon wout pwogrè.

**Nimewo 267:** Yo pa kab nonmen militè ki an sèvis aktif, nan okenn plas Leta, sòf pandan dezoutwa jou, pou yon travay espesyalis.

**Nimewo 267-1:** Pou yon militè ki an sèvis aktif gen dwa kandida nan eleksyon, fòk lite fè yo mete I an vakans, enn (1) an anvan dekrè eleksyon an parèt, ou byen fòk yo te mete I a laretrèt menm lè sa a.

**Nimewo 267-2:** Travay militè se yon metye. Gen divès grad ladan I. Se nan regleman lame d Ayiti yo jwenn nan ki kondisyon pou moun anwole, nan ki kondisyon pou manm lame vin gen grad, nan ki kondisyon pou yo moute grad, nan ki kondisyon pou yo revoke yo, nan ki kondisyon pou yo mete yo a laretrèt.

**Nimewo 267-3:** Pou yo jije yon militè nan tribinal militè, fòk li fè krim osinon fòt grav pandan peyi a nan lagè, ou byen fòk li fè kichòy kont regleman lame a.

Yo pa gen dwa revoke yon militè, san li pa dakò pou sa. Ni yo pa gen dwa mete I an vakans, ni yo pa gen dwa mete I sou kote kòmwa li pa alawotè, ni yo pa gen dwa mete I alaretrèt anvan lè I, san li pa dakò pou sa. Nan ka sa a, militè a gen dwa mande pou yon tribinal ki la pou sa, jije kòz la.

**Nimewo 267-4:** Militè toujou kenbe dènye grad yo te genyen nan lame a, jis yo mouri. Sèl lè yo vin pèdi grad sa a, se sizanka yon tribinal ki la pou sa, ta fè desizyon sa a, apre jijman fin fèt legal.

**Nimewo 267-5:** Militè tout grad fèt pou yo touche regilyè nan men Leta, yon jan pou yo viv san pwoblèm lajan.

**Nimewo 268:** Lame dwe bay konkou I, pou I ede òganize pwogram sèvis peyi, ni fi, ni gason oblige suiv la, jan sa ekri nan nimewo 52-3 konstitisyon an.

Tout Ayisyen ki déjà gen dizuit (18) ane, oblige fè sèvis militè.

Lalwa deside ki jan enskripsyon dwe fèt pou pwogram sa yo, konbyen tan yo dire, kouman pou yo mache.

**Nimewo 268-1:** Tout sitwayen gen dwa defann tèt yo ak zam, anndan lakay yo. Men, pou moun gen zam sou yo, fòk se chèf lapolis la ki ba yo pèmisyon pou sa. Fòk pèmisyon an klè, e fòk yo esplike rezon ki fè yo bay pèmisyon sa a.

**Nimewo 268-2:** Depi yon moun gen yon zam ki tire bal, lakay li, fòk li avèti lapolis.

**Nimewo 268-3:** Se lame d Ayiti sèlman ki gen dwa fè zam pou fè lagè, ansanm ak tout minisyon ki ale ak zam sa yo, ni tout materyèl pou fè lagè. Se lame sèlman ki gen dwa: voye chèche mod zam sa yo a letranje, voye yo a letranje, sèvi avèk yo, kenbe yo nan depo.

## Chapit 2

### La polis

**Nimewo 269:** Lapolis, se yon gwoup ki gen dwa gen zam. Li mache sou zòd ministè lajistis.

**Nimewo 269-1:** Yo mete lapolis pou li pwoteje dwa tout moun genyen pou yo viv anpè. Lapolis dwe pwoteje lavi tout sitwayen, ansanm ak tout byen yo. Lalwa deside kouman lapolis òganize ak kouman li dwe mache.

**Nimewo 270:** Konstitisyon an mande pou yo nonmen kòmandan lapolis pou yon tan sèvis twa (3) ane. Li gen dwa double.

**Nimewo 271:** Yo mete yon akademi ak yon lekòl lapolis. Lalwa deside kouman yo òganize ak kouman yo dwe mache.

**Nimewo 272:** Lapolis gen divès branch, youn pou chak sèvis espesyal:

- 1) Gen sèvis administrasyon prizon.
- 2) Gen sèvis ponpye.
- 3) Gen sèvis sikilasyon.
- 4) Gen sèvis gran wout.
- 5) Gen sèvis rechèch kriminèl.
- 6) Gen sèvis kont dwòg.
- 7) Gen sèvis kont kontrebann.

Lwa ki regle tout sèvis sa yo, se li ki regle kouman tout sèvis lapolis òganize, kouman yo mache, epi kote yo chita.

**Nimewo 273:** Lapolis la pou li ede lajistis jwenn moun ki an kontravansyon, moun ki fè fòt, moun ki fè krim. Se lapolis ki gen dwa arete moun sa yo.

**Nimewo 274:** Lè manm lapolis ap fè travay jandam yo, yo fèt pou yo respekte tout lwa yo rele lwa sivil ak lwa penal, nan tout jan sa make nan konstitisyon an ak nan lalwa.

## DOUZYÈM PATI KONSTITISYON AN

### Sou: Kèk pwen nan Konstitisyon an, ki vo an jeneral

**Nimewo 275:** Ni sèvis Leta, ni sèvis prive, ni kommès, pap travay jou fèt nasyonal ak jou fèt legal.

**Nimewo 275-1:** Men jou fèt nasyonal yo:

- 1) Premye janvye: Fèt endependans peyi d Ayiti.
- 2) 2 janvye: Fèt moun bn tan nou yo.
- 3) Premye me: Fèt kiltivatè ak travayè.
- 4) 18 me: Fèt drapo ak inivèsite.
- 5) 18 novanm: Fèt ki fè n sonje jou batay Vètyè. Fèt lame.

**Nimewo 275-2:** Lalwa va deside ki jou ki fèt legal.

**Nimewo 276:** Asanble nasyonal la pa gen dwa dakò pou I siyen okenn kontra, ni okenn deklarasyon, ni okenn antant, ak lòt peyi, depi ta gen de bagay ki pa ale avèk konstitisyon sa a ladan yo.

**Nimewo 276-1:** Se an fòm yon dekrè, asanble nasyonal la fè tout moun konnen li dakò pou I siyen ni kontra, ni deklarasyon, ni antant avèk lòt peyi.

**Nimewo 276-2:** Lè yo fin dakò byen dakò ak kontra, ou byen ak antant ak lòt peyi, selon sa konstitisyon an mande, kontra sa yo ak antant sa yo vin fè pati tout lwa ak regleman peyi a. Tout lwa ki ale kont yo, pa vo anyen.

**Nimewo 277:** Peyi d Ayiti gen dwa rантre kòm asosye, nan yon gwoup lòt peyi ki met tèt ansanm pou yo regle pwoblèm lajan ak pwoblèm ekonomi peyi sa yo. Men, fòk nan antant pou peyi d Ayiti asosye ak lòt peyi yo, pa gen anyen ki ale kont konstitisyon sa a. Okontrè, fòk li pouse peyi d Ayiti pi devan toujou, nan bon wout pwogrè, nan avantaj tout pèp la.

**Nimewo 278:** Yo pa kapab deklare okenn kote nan peyi a ann eta d syèj, sòf si gen lagè sivil, ou byen si lame yon lòt peyi anvayi peyi d Ayiti.

**Nimewo 278-1:** Deklarasyon Prezidan Republik la fè, pou I deklare eta d syèj, fòk Premye Minis la siyen I tou, ansanm ak tout lòt minis yo. Nan menm deklarasyon sa a, fòk yo mande asanble nasyonal la reyini tousuit, pou li kapab di, si sitiyasyon an mande eta d syèj.

**Nimewo 278-2:** Asanble nasyonal la deside, ansanm ak gouvènman an, ki nimewo yo gen dwa pa aplike nan konstitisyon an, nan kote yo deklare ki ann eta d syèj nan peyi a.

**Nimewo 278-3:** Apre yo mete eta d syèj, si asanble nasyonal la pa vote chak kenz jou pou li kontinye, eta d syèj kaba.

**Nimewo 278-4:** Asanble nasyonal la dwe travay pandan tout tan gen eta d syèj.

**Nimewo 279:** Anvan trant (30) jou pase, apre eleksyon Prezidan Republik la, se pou prezidan an remèt grefye tribunal pou premye jijman bo kote I rete a, yon papye tenbre, ak lis tout byen, tout kay, tout pwopriyete li genyen. L a fè menm jan tou, lè tan sèvis li fini.

**Nimewo 279-1:** Premye Minis, minis, ak sekretè d Eta va fè menm jan tou, anvan trant (30) jou pase, apre yo rантre nan plas yo, epi lè tan sèvis yo fini.

**Nimewo 280:** Gen twa gwoup moun ki gen pouvwa fè peyi d Ayiti mache. Lè Leta bay yon manm nan twa gwoup sa yo, yon travay espesyal pou li fè, Leta pa gen okenn lajan pou I peye manm nan pou travay espesyal li fè a.

**Nimewo 281:** Lè gen eleksyon nan peyi a, Leta fèt pou li peye yon pati nan depans ki fèt pandan kanpay la, selon valè vòt ki genyen.

**Nimewo 281-1:** Se pati politik yo sèlman ki kapab resevwa lajan sa a nan men Leta, lè yo gen dis (10) vòt omwen, sou chak san (100) vòt nan tout peyi a, epi lè yo gen senk (5) vòt omwen sou chak san (100) vòt, nan chak depatman.

## **TRÈZYÈM PATI KONSTITISYON AN**

### **Sou: Chanjman nan Konstitisyon an**

**Nimewo 282:** Gwoup moun ki gen pouvwa fè lwa nan peyi a, gen dwa mande chanjman nan Konstitisyon an, depi lachanm senatè ou byen lachanm depite, mande chanjman ak bon rezon pou sa. Gwoup moun ki gen pouvwa dirije peyi a, gen dwa fè menm jan tou.

**Nimewo 282-1:** Pou demann sa a bon, fòk gen de (2) manm ki dakò pou sa, sou chak twa (3) manm, ni lachanm senatè, ni lachanm depite. Se nan dènye peryòd travay lachanm, yo dwe fè demann sa a, yon jan pou yo kapab mete sa deyò, tousuit, nan tout peyi a.

**Nimewo 283:** Nan premye peryòd pwochenn epòk travay lachanm, ni lachanm senatè, ni lachanm depite, va fè yon sèl, pou yo fòme asanble nasyonal la. Se asanble nasyonal la ki va fè yon desizyon sou chanjman yo mande a.

**Nimewo 284:** Asanble nasyonal la pa kapab travay pou I etidye demann chanjman an, san pa genyen de (2) manm lachanm ki la, sou chak twa (3) manm, kit se lachanm senatè, kit se lachanm depite.

**Nimewo 284-1:** Pou nenpòt desizyon asanble nasyonal la bon, fòk gen de (2) bilten vòt ki dakò pou sa, sou chak twa (3) bilten vòt.

**Nimewo 284-2:** Yo pa gen dwa aplike yon chanjman yo vote nan konstitisyon an, anvan yo enstale pwochenn prezidan ki monte a. Prezidan ki te la, pandan yo vote chanjman an, pa janm gen dwa sèvi ak avantaj chanjman sa a ta pote pou li.

**Nimewo 284-3:** Yo pajanm gen dwa fè referandòm, pou yo mande pèp la si li dakò pou gen chanjman nan konstitisyon an.

**Nimewo 284-4:** Yo pajanm gen dwa fè okenn chanjman nan konstitisyon an, Si chanjman sa a ta fè, peyi a pa gen demokrasi anndan l ankò, ou byen si chanjman sa a ta fè, peyi d Ayiti pa yon republik ankò.

### **Katòzyèm Pati Konstitisyon an Sou: Kèk pwen nan Konstitisyon an, ki la ann atandan**

**Nimewo 285:** Konsèy nasyonal gouvènman an ap rete sou pouvwa jis 7 fevriye 1988. Se jou sa a, y ap enstale Prezidan Republik yo nonmen nan eleksyon, ak konstitisyon sa a, jan yo te prevwa sa nan kalandriye elektoral la.

**Nimewo 285-1:** Ann atandan depite ak senatè, yo va nonmen nan eleksyon ak konstitisyon sa a, kòmanse travay, konsèy nasyonal gouvènman an gen dwa met dekrè deyò. Dekrè sa yo, ki gen menm valè ak lwa, dwe fèt nan reyinyon konsèy minis, akjan konstitisyon an mande pou sa fèt.

**Nimewo 286:** Yon Ayisyen, ki te vin sitwayen yon peyi etranje, pandan ventnèf (29) ane, anvan 7 fevriye 1986 la, gen dwa tounen pran tout dwa sitwayen ayisyen l, ak avantaj lalwa bay yon sitwayen Ayisyen.

Pou l tounen vin Ayisyen, fòk li fè yon deklarasyon pou sa, nan ministè la jistis. Li gen yon delè de (2) ane apre yo bibliye konstitisyon an, pou l fè deklarasyon sa a.

**Nimewo 287:** Poutèt, sitiyasyon Ayisyen ki te lese peyi a pou pwèp volonte pa yo, ak sitiyasyon Ayisyen yo te egzile, tout dèle ki nan konstitisyon sa a, sou afè rezidans, pou pwochenn eleksyon an, pa depase enn (1) an.

**Nimewo 288:** Men kouman yo dwe konte tan sèvis twa (3) senatè y ap chwazi nan pwochenn eleksyon an, pou chak depatman:

- 1) Tan sèvis senatè ki gen pi plis vòt nan yon depatman, va dire sis (6) ane.
- 2) Tan sèvis senatè ki gen pi plis vòt nan depatman an, apre premye senatè sa a, va dire kat (4) ane.
- 3) Tan sèvis senatè ki gen pi plis vòt nan depatman an, apre dezyèm senatè a, va dire de (2) ane.

Apre premye eleksyon sa a, tan sèvis chak senatè va dire sis (6) ane.

**Nimewo 289:** Ann atandan yo mete konsèy elektoral ki la nèt la jan Konsititsyon an deja di a, konsèy nasyonal gouvènman an va fòme yon konsèy elektoral pwovizwa ak nèf (9) manm. Wòl konsèy sa a, se: fè lwa elektoral pou fè pwochenn eleksyon yo, epi fè aplike lwa sa a. Men ki jan yo va chwazi manm konsèy elektoral pwovizwa a:

- 1) Gwooup moun ki gen pouvwa dirije peyi a, va chwazi yon (1) manm, ki pa fonksyonè Leta.
- 2) Konferans episkopal monseyè katolik yo, va chwazi yon manm.
- 3) Konsèy konsiltatif la va chwazi yon (1) manm.
- 4) Tribunal kasasyon an va chwazi yon (1) manm.
- 5) Òganis ki defann dwa kretyen vivan ann Ayiti yo, va chwazi yon (1) manm.

- 6) Konsèy inivèsite a va chwazi yon (1) manm.
- 7) Asosyasyon jounalis yo va chwazi yon (1) manm.
- 8) Legliz pwotestan yo va chwazi yon (1) manm.
- 9) Konsèy nasyonal koperativ yo, va chwazi yon (1) manm.

**Nimewo 289-1:** Anvan kenz (15) jou pase depi pèp la di, li dakò avèk Konstitisyon sa a, gwoup ou byen òganis ki reskonsab chwazi manm konsèy yo, voye non moun yo chwazi yo, bay gouvènman an.

**Nimewo 289-2:** Sizanka youn nan gwoup sa yo ou byen youn nan òganis sa yo pa chwazi yon moun, se gouvènman an ki va chwazi moun nan.

**Nimewo 289-3:** Travay konsèy elektoral pwovizwa a gen pou l fè a, fini menm jou yo enstale prezidan ki pase nan elekson an.

**Nimewo 290:** Men kouman yo tire non nèf (9) manm premye konsèy elektoral ki la nèt la, pou yo konnen ki longè tan sèvis yo chak, yon jan pou yo kapab chanje twa (3) ladan yo, chak twa (3) zan: twa (3) premye non yo tire yo, va gen yon tan sèvis nèf (9) ane. Twa (3) lòt yo, va gen yon tan sèvis sis (6) ane. Twa dènye yo, va gen yon tan sèvis twa (3) ane.

**Nimewo 291:** Gen yon seri moun ki pap gen dwa chèche jwenn okenn plas Leta, pandan dis (10) ane apre yo piblilye konstitisyon sa a. Men, sa pa vle di, yo pa gen dwa mande jijman pou moun sa yo nan tribunal, pou tribunal pini yo ou byen pou tribunal fòse yo peye pou zak yo te fè yo. Men ki moun:

1) Moun tout moun byen konnen pou zak yo te fè, nan soutni rejim kraze zo ki pase ventnèf (29) ane sou pouvwa a.

2) Nenpòt moun yo panse ki fè kòb nan move komminezon sou do Leta, pandan yo te reskonsab lajan Leta a, sou rejim kraze zo a.

3) Tout moun pèp la denonse pou zak kraze zo, sou prizonye politik, sou moun yo arete, sou moun yo t ap mennen ankèt sou yo. Tout moun pèp la denonse kòmwa yo tiye moun pou politik.

**Nimewo 292:** Se pou konsèy elektoral pwovizwa a veyatif anpil ak sa ki ekri nan nimewo 291 la, nan travay resevwa non kandida yo.

**Nimewo 293:** Dekrè de (2) dènye gouvènman yo sou tè ak sou byen yo te pran nan espwopriasyon, ni lavil, ni andeyò, kit se an favè Leta, kit se an favè gwoup biznismann tap fòme, tout dekrè sa yo pa vo anyen, depi travay ki te fè, yo pran dekrè sa yo, pa te janm fèt, nan dis (10) ane ki sot pase yo.

**Nimewo 293-1:** Depi yo te pran byen yon moun, san rezon, depi yo te retire byen yon moun nan men I, illegal, pou politik, ant 22 oktob 1957 ak 7 fevriye 1986, moun sa a gen dwa parèt devan tribunal ki la pou sa a, pou yo remèt li byen I. Nan ka sa a, tribunal la pa nan pèdi tan. Li dwe fè jijman kòz sa a prese prese. Se tribunal kasasyon an sèlman, ki ta gen dwa kase jijman sa a.

**Nimewo 294:** Sizanka tribunal ki te jije moun ant 1957 ak 1986, te kondane yon moun poutèt politik, pou li sibi yon pinisyon ki grav ou byen ki ta fè l wont, moun sa a kontinye kenbe tout dwa sivil li ak tout dwa politik li, kanmenm.

**Nimewo 295:** Pandan sis (6) premye mwa apre yo fin enstale premye prezidan, yo chwazi nan elekson, ak konstitisyon 1987 la, gwoup moun ki gen pouvwa dirije peyi a, gen dwa pwòpte administrasyon publik la, pou yo mete l an fòm nèt. Yo gen dwa fè menm jan tou, pou jij ak tribunal.

## KENZYÈM PATI KONSTITISYON AN

### Dènye pwen nan Konstitisyon an

**Nimewo 296:** Depi sa ki nan yon liv lwa, nan yon mènyèl jistis, nan yon lwa, nan yon dekrè-lwa, nan yon dekrè, nan yon desizyon Leta, pa gen anyen ki ale kont sa ki nan konstitisyon sa a, yo dwe kontinye sèvi avè I toujou.

**Nimewo 297:** Nenpòt lwa, nenpòt dekrè-lwa, nenpòt dekrè ki wete kichòy sou manman dwa ak manman libète tout sitwayen pou plezi otorite, pa vo anyen anko. Tankou:

- 1) Dekrè-lwa 5 sektanm 1935 la, sou kwayans yo te bay pou vye kwayans.
- 2) Lwa 2 out 1977 la, ki te mete yon tribunal pou sekirite Leta.
- 3) Lwa 28 jiye 1975 la, ki te mete yon valè tè plenn Latibonit sou kont Leta ann atandan.
- 4) Lwa 29 avril 1969 la, kont tout sistèm lide ki soti a letranje.

**Nimewo 298:** Se pou yo pibliye konstitisyon sa a nan kenz (15)jou apre pèp la di, li dakò avè I, nan yon referandòm. Yo dwe kòmanse aplike konstitisyon an, lemoman li parèt nan jounal ofisyèl peyi a, kidonk Lemonitè.

Se nan palè lachanm Potoprens, kote asanble konstitiyant la te chita, nou siyen konstitisyon sa a, 10 mas 1987, ki fè peyi d Ayiti 183 ane depi li endepandan.

Mèt Emile JONASSAINT  
**Prezidan Asanble Konstitiyant la**  
Mèt Jean SUPPLICE  
**Vis-prezidan Asanble Konstitiyant la**

### **SEKRETÈ YO :**

Madan Bathilde Barbancourt; Mesye Jacques Saint-Louis; Mèt Raphaël Michel Adelson

### **MANM YO**

Mesye Daniel Anglade  
Mesye Yvon Auguste  
Mesye Karl Auguste  
Mesye Richard Baker  
Mesye Jean Adler Bassin  
Mèt Fresnel Bélizaire  
Mèt Rigaud Th. Bois  
Mèt Nyll Calixte  
Mèt Hugo Charles  
Mèt Clavarache Cherenfant  
Mèt Alcan Dorméus  
Mèt Chantal HudiCourt Ewald  
Mèt Rotchild François  
Mesye Rick Carnier  
Mèt Reynold Georges  
Mèt Antoine Cilles  
Dr Georges Greffin  
Mesye Alexis C. Guerrier

Mesye Louis Dominald Guerrier  
Mesye Apollon Israël  
Mèt Athanase Jean-Louis  
Mèt Wilbert Joseph  
Mesye Julio Larosilière  
Mesye Guy Latortue  
Mesye Gérard Mesye Laurent  
Mesye Lavelanet Lindor  
Mesye Jean Abraham Lubin  
Mèt Jean Léonidas Lucien  
Mèt François R. Magloire  
Mèt Jean Mainville  
Mesye Volvick Mathieu  
Mèt Justin Mezile  
Dr. Georges Michel  
Mèt Barbantès Moussignac  
Mèt Justin Obas  
Mèt Ménès Ovide  
Mèt Thalès Paul  
Mesye Franck Paulche  
Mesye Pierre Th. Pierre  
Mesye Gustave Pierre-Louis  
Mesye Réginal Riboul  
Mèt Gérard Romulus  
Dr. Louis Roy  
Mesye Gary Sajous  
Mèt Gracia Saint-Louis  
Mesye Eddy Saint-Pierre  
Mesye Pierre Saint-Rémy  
Mesye Benoit Sanon  
Mèt Michel Félix Sapini  
Mesye Jacques Séide  
Mèt Marc Sémervil  
Mesye Jean Edmond Tida  
Mesye Ecclésiaste Valcin  
Mesye Serge Villard